

## MATEO REMBICUACHIA JESUS RECOCUER RESENDAR SAN MATEO

*Ava eta oyesu vahe Jesucristo yesu renondeve*

<sup>1</sup> Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

<sup>2</sup> Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiquehir, tivireta reseve. <sup>3</sup> Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. <sup>4</sup> Aram rahir Aminadab, Aminadab rahir Naasón, Naasón rahir evocoyase Salmón, <sup>5</sup> Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, <sup>6</sup> Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

<sup>7</sup> Salomón rahir Roboam, Roboam rahir Abías, Abías rahir Asa. <sup>8</sup> Asa rahir Josafat, Josafat rahir Joram, Joram rahir evocoyase Uzías. <sup>9</sup> Uzías rahir Jotam, Jotam rahir Acáz, Acáz rahir ahe Ezequías. <sup>10</sup> Ezequías rahir Manasés, Manasés rahir Amón, Amón rahir evocoyase Josías. <sup>11</sup> Josías rahir Jeconías tivireta reseve, Babilonia ve mbiguai yuvirecoi vahecuer.

<sup>12</sup> Mbiguai yuvirecoire Jeconías omboyesu Salatiel, Salatiel rahir ahe Zorobabel. <sup>13</sup> Zorobabel rahir Abiud, Abiud rahir ahe Eliaquim, Eliaquim rahir evocoyase Azor. <sup>14</sup> Azor rahir Sadoc, Sadoc

rahır ahe Aquim, Aquim rahır evocoyase Eliud. <sup>15</sup> Eliud rahır Eleazar, Eleazar rahır ahe Matán, Matán rahır evocoyase Jacob. <sup>16</sup> Jacob rahır José, María mer, María evocoyase Jesús sı secoi. Ahe imembrı Tũpa Rembiporavo Poropĩsırosar.

<sup>17</sup> Evocoyase Abraham yesusa sui tuprı oye-pota oso David yesusa rupıve. Ahe catorce yesu yoapı agüer. David reco agüer sui oyepota oso ava mbiguai sereco agüer pıpe Babilonia ve; ahe omomba avei catorce yesu yoapı agüer. Mbiguai ava serecosa sui oyepota aravıter Poropĩsırosar haragüer rupı, ahe omomba iri avei ambuae catorce yesu yoapı agüer.

### *Jesucristo yesu agüer*

<sup>18</sup> Na ehi Jesucristo oyesu aracahe. María, ichı, ahe omenda pota vahe José rese. Oyese yuvırecoiẽhi vıteseve rumo, Espıritu Santo pıratasa pıpe imembı. <sup>19</sup> Evocoyase José, imevi, ahe ava seco catuprı vahe, “Tapoiño ayase ava icuaẽhısa pıpe che remimbotar rupı ichui” ehi chupe viña ‘co rupı tarecomegua eme co cuñatai rer aviye vahe’ ohesa pıpe. <sup>20</sup> Aipo opıhañemoñeta reseve oque. Iquerve rumo, Tũpa rembiguai oyem-boyecua chupe aipo ehi: “José, David suıdar, eresıquıyei rene María rese nde menda ãgua. Es-epia, Espıritu Santo sui ou imembırã. <sup>21</sup> María vırecese omembrı, pemondora sererguã Jesús. Es-epia, ahe oipısırora omu judıo eta yangaipa sui” ehi.

<sup>22</sup> Co rupı opa yaviye yande Yar remimombe-hugüer aipo ehi vahecuer iñehe mombehusar aracahe:

<sup>23</sup> “Cuña ndaseco marai vahe imembira. Ahe imembrî rer-ra Emanuel” ehi (“Tũpa yande rese ité secoi’ oya aipo ehi).

<sup>24</sup> Omahese José, Tũpa rembiguai oyeupe ñehe agüer omboyeroya ité. Ichui omenda María rese cute. <sup>25</sup> Ndoyapo vîtei eté rumo mbahe oyese yuvîreco. Yipîndar imembira rane ité, ahese José omondo Jesús sererguã.

## 2

*Ava yasitata rese oyembohe vahe ari sêsa cotîndar yuvîraso pîtani repia*

<sup>1</sup> Herodes mborerecuar guasu recose, Jesús oha Judea ivî rupi tecua Belén ve. Coiye yugüeru ava yasitata rese oyembohe vahe ari sêsa cotî sui Jerusalén ve. <sup>2</sup> Ahe oporandu Herodes upe yuvîreco aipo ehi:

—¿Que vo aipo oha judío rerecuar guasu? Esepia niha, caharu cotî yasitata orosepia. Sese oroyu ari sêsa cotî sui imboetei ãgua —ehi yuvîreco chupe.

<sup>3</sup> Aipo ihese, mborerecuar Herodes oyembosiquiye tõi, ava Jerusalén pendar avei ëgüe ehi pãve yuvîreco. <sup>4</sup> Iyavei cũriteimi opa omonuha uca pahî rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropîsîrosar? —ehi.

<sup>5</sup> Ahe omboyevi yuvîreco chupe:

—Ahe ohara Judea rupi Belén ve —ehi—. Esepia, Tũpa ñehe mombehusar Miqueas rembicuachiagüer pipe aipo ehi:

<sup>6</sup> Pe, tecua mini Belén pipendar, ndahei ivî cotî tõi vahe ambuae tecua Judá pipendar sui peico.

Esepia, pe sui osēra mborerecuar che recua iguar  
Israel yocuai āgua' ehi —ehi  
yuvireco Herodes upe.

<sup>7</sup> Aipo hese, Herodes oñehe ñemi ava yasitata  
rese oyembohe vahe upe 'toicua eme ava  
yuvireco' oyapave oporandu: “¿Mbahe yasi pipe  
ité vo pesepia ramo aipo yasitata?” ehi. <sup>8</sup> Oyeupe  
mombehu pare, omondopa Belén ve aipo ehi  
chupe:

—Peso evocoyase, peseca pītani. Acoi peyosuse,  
co rupi avei peyevī cheu icua uca āgua. Che avei  
evocoyase tasomi imboetei —ehi angahu chupe.

<sup>9</sup> Aipo oyeupe he pare, yasitata rese oyembohe  
vahe osiriño voi yuviraso. Ahe pipeve yasitata  
oyemboyecua iri senonera. Ichui pītani recosa  
rese tupri tecua Belén ve opita yasitata. <sup>10</sup> Sepiase,  
oviĥareté yuvireco. <sup>11</sup> Ipare yuviroique oī pipe,  
osepia pītani ichi María reseve yuvireco. Ichui  
oñenopiĥa sovai imboeteisa pipe. Ipare opōhe om-  
bahe rīru pipe yuvireco oicuvēhe vaherā opor-  
erecosa sepīrusu vahe oro, itaīsi, ambuae mbahe  
sīacua vahe mirra serer vahe avei. <sup>12</sup> Yuviroyevise  
güecuave yuviraso, ndoyuviroyevī iri Jerusalén  
rupi mborerecuar Herodes upe imombehu. Es-  
epia, Tūpa aipo omombehu iquerve chupe am-  
buae perī rupi iyevī āgua.

### *Jesús pītani seroñemisa Egipto ve*

<sup>13</sup> Aipo ava yepepi pare, José upe oyemboye-  
cua Tūpa rembiguai iquerve, aipo ehi chupe:  
“Eñarapuha, eroñemi pītani ichi reseve eraso Egipto  
ve. Aheve erepitara acoi che amombehuse voi nde

yevi ãgua. Esepia, mborerecuar Herodes osecara pĩtani yuca ãgua oico” ehi chupe.

<sup>14</sup> Ahe pĩtu pipeve voi José viraso pĩtani ichi reseve Egipto ve. <sup>15</sup> Aheve yuvirecoi co mborerecuar Herodes mano rãro. Co rupi imboaviyesa Tũpa ñehe mombehugar remimombehuguer: “Egipto sui anose che Rahir” ehi vahe.

*Herodes oyuca uca chĩhivahe eta*

<sup>16</sup> Mborerecuar Herodes rumo oñemoiró iteanga yasitata rese oyembohe vahe ombopa tẽisa rese. Sese, “Toyuviraso sundao tecua Belén ve, toyucapa chĩhivahe cuimbahemi yuvireco opacatu ñuvirío araviter ovireco vahe, chĩhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cũritei.

<sup>17</sup> Ëgũe ehi yaviye Tũpa ñehe mombehugar Jeremías remimombehuguer aipo ehi vahe:

<sup>18</sup> “Oyeendu ava Ramá ve.

Ahe Raquel oyaseho ité omembireta manose; ndoyembovaha catui eté ipipe” ehi.

<sup>19</sup> Mborerecuar Herodes manore, Egipto ve José upe oñehe iri Tũpa rembiguai iquerve aipo ehi: <sup>20</sup> “Eñarapuha, eroyevi pĩtani ichi reseve Israel recuave. Esepia, opa omano pĩtani yuca potasar yuvireco” ehi.

<sup>21</sup> Aipo oyeupe hese, oñarapuha, viroyevi pĩtani ichi reseve Israel recuave. <sup>22-23</sup> Perĩ rupi oyanduse rumo Arquelao vu recoyar mborerecuar chinise, ahese oyembosiquiye aheve oso ãgua. Coiyemi tẽi iquerve Tũpa, “Peso Galilea ivi rese” ehi chupe.

Ichui yuviraso tecua Nazaret ve. Aheve opita yuvireco cute. Ëgüe ehi yaviye Tūpa ñehe mombehusar remimombehugüer: “ ‘Nazaret pendar’ ehira serecosa” ehi vahe.

### 3

*Juan Oporoãpiramo vahe ivi iporupirēhisa rupi secoi*

<sup>1</sup> Ipare Juan Oporoãpiramo vahe Tūpa recocuer rese oñehe oico Judea ivi rupi ava yemboerecuaēhisave <sup>2</sup> aipo ehi: “¡Pemboasi pe angaipa; peyevi Tūpa upe! Esepia, co Tūpa mborerecuasa cōimi secoi yandeu” ehi.

<sup>3</sup> Co Juan rese niha oñehe yipive Tūpa ñehe mombehusar Isaías aipo ehi güembicuachiagüer pipe:

“Oyeendu ñehesa ava yemboerecuaēhisave: ‘Pemoingatu yande Yar raperã; pemohivi tupri avei’ ehi” ehi aracahe.

<sup>4</sup> Juan turucuar ahese camello ragüer apopri, sumbicuasa mbahe pিরer, sembihu evocoyase tucru, eiri caha pipendar avei. <sup>5</sup> Opacatu ava Jerusalén pendar, Judea rupindar tecua, iai Jordán rerovica pendar avei yuviraso iñehe rendu <sup>6</sup> oangaipagüer mombehu āgua. Ahese Juan oñapiramo iai Jordán pipe.

<sup>7</sup> Yugüeru atise rumo fariseo iyavei saduceo oñeapiramo uca āgua, Juan aipo ehi ahe ava upe: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaheñā sui’ ehi tupri tēi pēu?” <sup>8</sup> Yipindar toyecua tupri rane Tūpa upe pe yevisa pe angaipa mboasisa pipe. <sup>9</sup> Iyavei ndapeyeroyai chira ‘ore Abraham suindar oroico’ pe hesa rese

têi pe ñepisiro ãgua. Esepia, Tũpa oicatuño ité co ita sui Abraham suindar nungar tupri apo ãgua oyeupe nara yepi. <sup>10</sup> Hacha niha imoingatusa voi eté opacatu ivira ndihai vahe sapo rupi yasia ãgua. Ichui yasia pare imondosa tatave. <sup>11</sup> Che i pipe tẽi opoãpiramo Tũpa upe pe yevi ãgua. Oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora ãgua ichui. <sup>12</sup> Ahe oipehara mbahe rãhi ihigüer sui. Sãhi evocoyase oyapocatura, ihigüer rumo omondora tata apirẽhi vahesave” ehi.

### *Jesús ãpiramosa*

<sup>13</sup> Ipare Jesús oso Galilea sui iai Jordán ve Juan recosave ‘tache ãpiramo’ oya. <sup>14</sup> Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

<sup>15</sup> —Ëgüe tehiño aipo. Iyacatu yayapora Tũpa porocuaíta —ehi Juan upe.

Evocoyase Juan, “Aviye” ehi chupe. <sup>16</sup> Oãpiramo pare, osẽ ive sui. Ahe pipeve voi iva oyemboi tupri, aheseve avei osepia Tũpa Espiritu ogüeyise ou iharive apicasu nungar. <sup>17</sup> Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

## 4

### *Jesús recoãhasa*

<sup>1</sup> Ipare Tũpa Espiritu viraso Jesús ava yemboerecuaẽhisave ‘tosecoãha Caruguar’ ohesa pipe.

<sup>2</sup> Aheve cuarenta ari, cuarenta p̄itu ndocarui. Sese ndas̄epoi eté oico. <sup>3</sup> Evocoyase oyemboya Carugar sese secoãha ãgua, aipo ehi chupe:

—Tũpa Rah̄ir ité nde recose, co ita sui eyapo pan cũritei —ehi.

<sup>4</sup> Jesús rumo omboyev̄i chupe:

—Icuachiapri p̄ipe rumo aipo ehi:

‘Ndahei chira pan sui gũeraño ava yuv̄irecove.

Ëgüe ehi rumo opacatu Tũpa Ñhengagüer reroya p̄ipe ava yuv̄irecovera yepi’ ehi —ehiño chupe.

<sup>5</sup> Ichui Carugar viraso Jesús Jerusalén maranehi p̄ipendar tũparo torre ap̄terve. <sup>6</sup> Aheve aipo ehi chupe:

—Tũpa Rah̄ir ité nde recose, ev̄iap̄i cohove sui. Esepia niha, icuachiapri p̄ipe:

‘Tũpa oyocuaira güembigui eta nde rãro ãgua.

Ahe nde mopuhara yuv̄ireco que ñepēi ita nde momara rãgüer sui’ ehi —ehi Carugar chupe.

<sup>7</sup> Evocoyase omboyev̄i Carugar upe:

—Icuachiapri p̄ipe rumo aipo ehi avei no: ‘Nderesecoãhai chira nde Yar Tũpa’ ehi —ehi chupe.

<sup>8</sup> Ipare Carugar viraso iri iv̄itri iv̄ate vahe ap̄terve secoãha ãgua. Aheve aipo opacatu iv̄i p̄ipendar, tecua guasu p̄ipendar mbahe porañete vahe yemboivate aisa omboyecua chupe, <sup>9</sup> aipo ehi:

—Che rovai ereñenop̄ihase che mboeteisave, co opacatu mbahe nde rembiepia amondora nde maha —ehi Carugar chupe.

<sup>10</sup> Aipo oyeupe hese:



—Eyepepi che sui cūrītei, Carugar —ehi—. Es-epia, icuachiapri: ‘Emboetei nde Yar Tūpa, ahe güeraño tupri avei eremboyoyara’ ehi —ehi Carugar upe.

<sup>11</sup> Ahese Carugar oyepēpi ichui. Ipare Tūpa rembiguai yuvirogüeyi Jesús rese hañeco ãgua yuvireco.

*Jesús omboipi oporombohe Galilea rupi*

<sup>12</sup> Jesús oyanduse Juan roquendasa, oso Galilea ivi rese Nazaret ve. <sup>13</sup> Ndopitai rumo aheve. Osoño Capernaum ve, aheve opita. Ahe tecua ipa Galilea ivi, ivi Zabulón iyavei Neftalí rupi avei.

<sup>14</sup> Na ehi yaviye Tūpa ñehe mombehusar Isaías rembicuachiagüer aipo ehi vahe aracahe:

<sup>15</sup> “Co ava ivi Zabulón pendar, Neftalí pendar, para guasu ivirindar, iai Jordán rovaindar iyavei Galilea pīpendar ndahei vahe judío,

<sup>16</sup> ahe aviye pītumimbisave yuvirecoi vahe, osepia ramo vahe tesapesa yuvireco; iyavei mano rãgüer pipe yuvirecoi vahe upe avei aviye oyecua ramo vahe tesapesa” ehi.

<sup>17</sup> Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secoi” ehi.

*Jesús, “Perio che rupi” ehi irungatu pira mbohasar upe*

<sup>18</sup> Coiye ipa Galilea ivi oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. <sup>19</sup> Evocoiyase:

—Pe pira recasar peico. Perio che rupi. Na peye aveira ava reca ãgua cheu nara —ehi chupe.

<sup>20</sup> Aipo he ramoseve, opoi opira mbohasa sui yuvireco, yuviraso supi.

<sup>21</sup> Coi coti catu aipo Jesús osepia ambuae mbia Santiago tivri Juan reseve, ahe uguapi yuvinoi carite pipe oyesupa Zebedeo piri; omoingatu opira mbohasa yuvinoi. <sup>22</sup> “Perio che rupi” he ramoseve, opaño oporaviquisa sui opoi yuvireco, oseyaña oyesupa, yuviraso supi.

### *Jesús ombohe ava rehi*

<sup>23</sup> Jesús evocoyase uguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui. <sup>24</sup> Oyepotase rumo serācua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

<sup>25</sup> Ëgüe ehi ava rehi uguata yuvireco opacatu iguata rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

## 5

### *Jesús oporombohe ivitri ve*

<sup>1</sup> Ñepeí arí pipe, ava rehi repiase, Jesús oyeupi ivitri rese. Aheve uguapi oí. Ahese semimbohe oyemboya yuvireco sese. <sup>2</sup> Ichui omboipi imbohe aipo ehi:

<sup>3</sup> “Sorivete catura acoi ava oicuaase mbahe ipane vahe Tūpa rese ité güeco tupri ãgua. Esepia niha, chupe nara ité Tūpa mborerecuasa.

<sup>4</sup> “Sorivete catura acoi ava oyaseho vahe oviharēhisa pipe. Esepia niha, Tūpa omboura viharetesa chupe coiye.

<sup>5</sup> “Sorivete catura ndaseco asimi vahe. Esepia, ahe chupe imondosara co ivi imahera curi.

<sup>6</sup> “Sorivete catura ava oipota vahe teco catupri sa Tūpa suindar. Esepia, chupe ité ahe imondosara.

<sup>7</sup> “Sorivete catura acoi ava oporoparisuereco vahe. Esepia, ahe Tūpa oiparisuerecora.

<sup>8</sup> “Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

<sup>9</sup> “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

<sup>10</sup> “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

<sup>11</sup> “Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapoyapo tēise güemira-mira tēi pipe mbahe pe rese che recocuer sui tēi yuvireco. <sup>12</sup> Pe rumo peyembovihañora. Esepia, ivave tuvichá vahe porerecos peipisira curi. Ëgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

*Jesús reroyasar aviye yucri iyavei tesapesa yuvirecoi ava upe*

13 “Co ivi pipe pe aviye yucri peico opacatu ava upe. Yucri rumo nasehe irise, ndayaicatu imoehe iri ãgua, ndiporusai chietera; imombopasara ava pirunga ãgua yuvireco.

14 “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatu ñomi ãgua. 15 Iyavei ndayamoendi chira tataendi mbahevri tēi. Iyacatu rumo yasupi ivate sendave opacatu oi pipendar ava resape ãgua. 16 Pe ãgüe peye aveira pemboyecua ava eta upe pe recocuer aviye vahe. Ipape sui tomboetei yande Ru Tūpa iva pendar yuvireco” ehi ava rehi upe.

*Jesús oporombohe Moisés porocuita rese*

17 “Aní chira, ‘Co mbia revo oporombohe Tūpa ñehe mombehusar rembicuachia mboyeroaēhi ãgua iyavei Moisés porocuita cuachiapri mboyeroaēhi ãgua avei no’ peye tēi cheu. ãgüe ehi rumo che ayu imboaviye ãgua. 18 Supi eté co iva, ivi avei yandeu oime vitemiseve, ndipoi chietera que ñepi yepe Moisés porocuita, que ambuae Tūpa ñehe mombehusar rembicuachiagüer ocañi tēi vaherã; ñepi-pe porocuita imombehupri imboaviesañi itera. 19 Sese acoi ava ndoviroyai vahe que ñepi mborocuitamira viña, ombohe avei ava seroyaēhi ãgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborerecuasave curi. 20 Iyavei amombehu pēu: acoi pe reco ivi tuprisa ndaheise aviye catu vahe

fariseo recocuer sui iyavei ndaheise aviye catu vahe Moisés porocuaíta rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

*Jesús oporombohe ñemoiroẽhi ãgua rese*

<sup>21</sup> “Pe peicua acoi pe ramoí aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi. <sup>22</sup> Che rumo aipo ahe pẽu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ãgũe ere tẽi vahe eico’ ehi vahe ambuae ava upe, ahe serasosara porandu ãgua mborerecuar ivate catu vahe rovai. Acoi ava rumo oñehe marase seroĩrosave ambuae ava upe, ahe iyacatu imondosa ité tata guasuve.

<sup>23</sup> “Sese Tūpa upe pe porerecosa reropovẽhesave tũparo pĩpe pemahenduhase ava pe amotarẽhimbar rese, <sup>24</sup> peseya rane pe porerecosa aheve; peyevĩ rane pe amotarẽhimbar upe pẽu iñero ãgua rese. Acoi peñerose oyeupe, ahese voi peyevĩ, tapeicuavẽhe pe porerecosa Tūpa upe.

<sup>25</sup> “Iyavei peyeamotarẽhise, peñero voi oyeupe peyoepiase. Anise, avieteramo coiye catu tẽise pe mombehu tẽira pe amotarẽhimbar mborerecuar upe pe reraso ãgua. Ichui avieteramo ahe pe roquenda ucara. <sup>26</sup> Supi eté aipo ahe pẽu: Ndapesẽi chietera acoi peyemboepĩpase voi eté pesẽra ichui” ehi.

*Jesús oporombohe yemboaguasaẽhi ãgua rese*

<sup>27</sup> “Peicua niha Moisés porocuaíta yipĩndar: ‘Peaguasai rene ambuae ava rembireco rese’ ehi

vahe. <sup>28</sup> Che rumo aipo ahe pëu: Acoi ava omahese cuña rese ipotasa pîpe, ahe inungar oyapo vahe ité mbahe sese opîha pîpe yepi.

<sup>29</sup> “Iyavei inungar que pe resa pe acato cotindar oipota rai ucase mbahe pëu pe mboangaipa âgua tēi, iya penose ité, pemombo amombrî peyesui. Aní pe mondo uca opacatu pe recocuer tata guasuve. <sup>30</sup> Iyavei inungar que pe po pe acato cotindar pe mboangaipa ucase, iya peyasía ité imombo amombrî peyesui. Aní pe mondo uca opacatu pe recocuer tata guasuve” ehi.

*Jesús oporombohe ava mendasa sui poiēhi âgua rese*

<sup>31</sup> “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvîreco chupe’ ehi. <sup>32</sup> Che rumo aipo ahe pëu: ava opoise güembireco sui, cuña ndoyaviise mbahe, ahese ombopîhañemoñeta tiētera güembireco mboaguasa uca âgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

*Jesús oporombohe Vu Tūpa rer poru tēiēhi âgua rese*

<sup>33</sup> “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pîpe mbahe pemombehu vahe yepi’ ehi. <sup>34</sup> Che rumo, ‘Ndapeñehei chira que mbahe rer pîpe, iva rer pîpe tēi avei’ ahe pëu. Esepia, ahe niha Tūpa renda; <sup>35</sup> ivî rer pîpe tēi avei ndapeñehei chira. Esepia, ahe Tūpa pîrunga; Jerusalén rer pîpe avei ndapeñehei chira. Esepia, ahe niha mborerecuar ivate catu vahe recua. <sup>36</sup> Pe âca rer pîpe avei ndapeñehei chira. Esepia,

ndapeicatui chira que ñepeí pe ha momorochei ãgua, imou ãgua avei. <sup>37</sup> Sese niha peñehese, ñepeí reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

*Jesús oporombohe yande amotarēhisar upe mbahe tēi mboyeveñhi ãgua*

<sup>38</sup> “Peicua acoi Moisés porocuita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sãí ichui, sãí avei senosesara’ ehi vahe. <sup>39</sup> Che rumo aipo ahe pēu: Aní chira pemboyeveñ pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. <sup>40</sup> Porandusave pe rerasose pe camisa rerocua ãgua yuvireco pe sui, pe saco avei pemondoñora chupe. <sup>41</sup> Ñepeí legua rupi evosií co mbahe rese cheu’ ehise que ava pēu, pe rumo perasoñora ñuvirío legua rupi chupe. <sup>42</sup> Iyavei oporanduse que pe mbahe rese yuvireco pēu, pemondoño avei chupe. Aní chira perecatēhi sese” ehi.

*Pesaisu pe amotarēhimbar*

<sup>43</sup> “Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe. <sup>44</sup> Che rumo aipo ahe pēu: Pesaisu catu pe amotarēhimbar iyavei peyeroqui pe momara potasar rese. <sup>45</sup> Evocoi nungar apo pipe pe Ru Tūpa íva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. <sup>46</sup> Pe raisupar güeraño

pesaisu catu tēise, ndapeipisii chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. <sup>47</sup> Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi. <sup>48</sup> Sese pe recocuer perecora pe Ru Tūpa iva pendar seco catupri vahe nungar” ehi.

## 6

*Jesús oporombohe mbahe aviye vahe apo ãgua rese*

<sup>1</sup> “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ěgüe peyese, ndapeipisii chietera pe Ru Tūpa iva pendar porerecosa. <sup>2</sup> Evocoyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbĩ omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: Ěgüe ehi vahe rumo opa voi oipisi porerecosa co ivi pipe tēi yuvireco. <sup>3</sup> Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. <sup>4</sup> Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

*Jesús oporombohe yerure ãgua rese*



<sup>5</sup> “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opũha-pũha catu tũparo pipe oyeruqui yuvireco cupiha yacatu avei ‘tayande repia angahu ava’ ohesa pipe tẽi. Supi eté che aipo ahe pẽu: Ëgũe ehi vahe opa voi eté co ivi pipeve tẽi oipisi porerecosa yuvireco. <sup>6</sup> Iyacatu rumo pe, peyeruqui potase, peiquera pe rêta pipe peyeoquendara pe ae pe yeroqui ãgua pe Ru Tũpa upe. Evocoyase pe Ru Tũpa oicua vahe mbahe pe rembiapo, iporerecora pe rese.

<sup>7</sup> “Iyavei peyeruquise, ndapemboyevi-yevii chira pe ñehe pe poranduse mbahe rese Tũpa upe inungar ava Tũpa ndoicuai vahe. Ahe omboyevi-yevi oyeruresa ‘Tũpa revo co rupi yande mboyeroa voira’ ohesave yuvireco viña. <sup>8</sup> Aní chira inungar tẽi peico. Esepia, pe Ru Tũpa oicua pe porandu renondeve mbahe ipane vahe pẽu. <sup>9</sup> Sese aipo peyera peyeruqui:

‘Ore Ru Tũpa, ivave ereico vahe, imboeteipri nde rer tasecoi.

<sup>10</sup> Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

<sup>11</sup> Embou ore rembihu ari yacatundar oreu co ari pipe.

<sup>12</sup> Iyavei ndeñero ore angaipa rese oreu inungar ore oreñero ore amotarẽhimbar upe.

<sup>13</sup> Ore mboangaipa ucai rene eve; eipeha mbahe naporai vahe ore sui’ peyera.

<sup>14</sup> “Esepia, pe amotarẽhimbar upe peñerose, pe Ru iva pendar avei iñerora pẽu; <sup>15</sup> ndapeñeroise rumo, ahe avei niñeroi chietera pẽu” ehi.

*Jesús oporombohe yecuacusa rese*

<sup>16</sup> “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerecosa ava güepia pipe tēi yuvireco. <sup>17</sup> Pe rumo peyecuacuse, peñeaca monodoro tuprira, peyovai tupri aveira. <sup>18</sup> Evocoyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepia vahe, güeraño oicuará pe yecuacusa. Ahe evocoyase iporerecora pe rese curi” ehi.

*Mbahe porañeté vahe oime ivave*

<sup>19</sup> “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sãve-sãve tēi opochi ati-ati opocatusave, imonda vahe avei evocoyase imondaño sese pēu. <sup>20</sup> Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi ãgua. <sup>21</sup> Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

*Yande resa inungar tataendi yande recocuer uve*

<sup>22</sup> “Iyavei yande resa inungar tataendi yande retecuer upe. Evocoyase yande resa aviyesa, opacatu yande retecuer upe osesape; <sup>23</sup> acoi imarase rumo, opacatu yande retecuer pĩtumimbisave tēi secoi. Tesapesa oime vahe

yande rese, ahe ogüese rumo yande sui, mbahe tēi eté, p̄itumimbi nungar opacatu yande recocuer upe” ehi.

*Guarepochi pota raisa; Tūpa mboyeroyaēhisa*

24 “Iyavei ndipoi chietera que ava ñuvirío güerecuar omboyeroya vahe. Esepia, ñepeí oyamotarēhira imboyeroya potaēhisa p̄ipe, ambuae evocoyase osaisu catura imboyeroysa p̄ipe. Ēgüe peye avei, ndapeicatui Tūpa mboyeroya guarepochi pota raisa p̄ipe” ehi.

*Tūpa osāro guahireta*

25 “Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarā rese tēi avei no. Esepia, yande recovesa aviye catu vahe tembihu sui, yande retocuer avei aviye catu turucuar sui no. 26 Pesepia v̄irai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico v̄irai sui! 27 Ndipoi que ñepeí pe p̄ahu pendar oicatu vahe opihañemoñetasa p̄ipe tēi güecocuer mopucu iri āgua.

28 “Ndahei chira pe turucuarā rese tēi peyemomahenduha guasu ai. Pemahecua ru mbahe potri caha p̄ipendar rese: ndoporaviquii eté iyavei ndoip̄iai oturucuarā. 29 Iyavei yepe mborerecuar guasu Salomón v̄ireco setá ombahe iporañete vahe aracahe viña, iturucuar catupr̄igüer rumo ndahoyoyai mbahe potri catupr̄igüer rese. 30 Tūpa niha omboporañete

raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe! <sup>31</sup> Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pipe. <sup>32</sup> Ava Tūpa reroyasarēhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe. <sup>33</sup> Pemahenduha rane Tūpa rese pe recocuer tupri pipe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu. <sup>34</sup> Peyemomahenduha guasa ai eme mbahe peyapo vaherā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vaherā yepi.

## 7

### *Aní, “Oyavi mbahe” peye voi ambuae upe*

<sup>1</sup> “Ndiyai, ‘Oyavi ité mbahe’ peye voiño tēi ambuae ava upe; evocoyase Tūpa, ‘Oyavi mbahe’ ndehi chira pēu. <sup>2</sup> Esepia, inungar pe ambuae ava upe peico, ēgüe ehi aveira niha Tūpa pēu. <sup>3</sup> ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesia! <sup>4</sup> Ndiyai pēu, ‘Che toropitivíi mbahe nde rembiavi rese’ peye vaherā chupe. Esepia, ¡pe peyavi guasu catu mbahe ichui! <sup>5</sup> ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui,

ahese ramo ambuae ava rembiavi tahimi vahe moingatu peicatura.

<sup>6</sup> “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchī nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

*Peporandu Tūpa upe pēu mbahe ipane vahe rese*

<sup>7</sup> “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tūpa upe, ahese imbousara pe porandusa pēu. <sup>8</sup>Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerquisa pipe omota vahe oquenda Tūpa upe, chupe imboisara.

<sup>9</sup> “Ndipoi eté revo que ñepepe pe pāhu pendar omondo vaheṛã ita tēi guahir upe pan rese oyeupe poranduse. <sup>10</sup> Que pira rese oyeupe poranduse revo, ndomondoi chaveira mboi tēi chupe. <sup>11</sup> Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. jTahetru pe Ru i va pendar oipota catu mbahe aviye vahe mondo āgua acoi ava mbahe rese oporandu vahe upe!

<sup>12</sup> “Acoi mbahe peipota vahe ambuae ava oyapo vaheṛã pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

*Oime peri icāhimi vahe ava recocuer upe nara*

<sup>13</sup> “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso

vahe. Ahe supi setá catu ava yuvirasó; <sup>14</sup> teco apirêhisave oso vahe rumo oquendipi, peri reseve icâhimi. Supi guata ãgua yavai eté; moviromi tēi ava oseca yuvireco” ehi.

*Ivira aviye vahe icuasa iha rese*

<sup>15</sup> “Coīye yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. <sup>16</sup> Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sâchi ati vahe sui. <sup>17</sup> Evocoiyase ivira aviye vahe, iha aviye avei; ivira naporai vahe, iha naporai avei no. <sup>18</sup> Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. <sup>19</sup> Sese opacatu ivira iha naporai vahe yasiasa yepi. Ichui imondosapa tatave. <sup>20</sup> Na peyera ava recocuer cua sembiapo rese” ehi.

*Ndahei chira opacatu ava yuviroique Tūpa mborerecuasave*

<sup>21</sup> “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve. <sup>22</sup> Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo caruguar ava sui nde rer pipe, setá poromondiisa oroyapo’ ehi tēira yuvireco cheu. <sup>23</sup> Che rumo, ‘¡Aní, ndopocuai! ¡Pe

mbahe tēi peico vahe, peyepēpi che sui!’ aheñora aipo nungar upe” ehi.

### *Ñuvirío oi apopri*

<sup>24</sup> “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güëtarã. <sup>25</sup> Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. <sup>26</sup> Acoi ava che ñehengagüer rese ndoyapisacai vahe rumo, ahe inungar ava opihañemoñeta tupri ehisa pipe omopuha vahe ivi cuhi harive tēi güëtarã. <sup>27</sup> Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehi upe.

<sup>28</sup> Iñehe renduse ava rehi, “¿Mara ehi rutei?” ehi tēi yuvireco chupe. <sup>29</sup> Esepia, ndahei Moisés porocuita rese oporombohe vahe nungar; ahe rumo oporombohe güeco pĩratasa pipe.

## 8

### *Jesús ombogüera ava lepra vireco vahe*

<sup>1</sup> Ivitri sui ogüeyise Jesús, ava rehi avei yuvirecoi supi. <sup>2</sup> Ahese ava lepra vireco vahe ou, oñenopihã sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

<sup>3</sup> Aipo ihese, Jesús opoco sese aipo ehi:

—Taa, aipota. ¡Ecuera cūritei! —ehi.

Aipo ihe ramoseve, ocuera voi eté.

<sup>4</sup> —Nde cuerasa eremombehu eme ambuae ava upe —ehi—. Nde poyavaño eso, eyemboyecua

judío pahi upe. Ipare eicuavêhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

*Jesús ombogüera sundao rereciar remimboacua*

<sup>5</sup> Ipare Jesús oguataño, ãgüe ehi tecua Capernaum ve oyepota oso. Aheve oime sundao rereciar Roma iguar. Ahe ou chupe <sup>6</sup> aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tõi ombahehasisa ou —ehi.

<sup>7</sup> —Aviye, cūrítei evocoyase asora imbogüera —ehi.

<sup>8</sup> —Aní, che Yar, ndiyai eté che rēta pipe nde reique ãgua; iyacatu niha cohapeve ereñeheño tõi icuera ãgua. Evocoyase nde ñehe pipe tõi che remimboacua ocuerara. <sup>9</sup> Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

<sup>10</sup> “¡Too!” ehi Jesús aipo oyeupe hese. Ichui aipo ehi oyeupindar ava rehi upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. <sup>11</sup> Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rereciar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiyé.

<sup>12</sup> Judío eta rumo, oyeupe ñehesa reroyañhi pipe



setá pĩtumimbisave ocañi tẽira yuvireco. Aheve oyaseho tẽira yuvireco iyavei oñeaimbotere-tere tẽira mbaherasicuer rereco yuvireco —ehi oñehe.

<sup>13</sup> Evocoyase sundao rerecuar upe aipo ehi:

—Eso, nde mbahe reroya pĩpe yaposa nde remimbotar ndeu —ehi.

Ahe pĩpeve semimboacua ocuera tupri ité.

*Jesús ombogüera Pedro rembireco si*

<sup>14</sup> Ipare Jesús oso Pedro rêtave. Aheve osepia Pedro rembireco si sohí iteangase vupave ou.

<sup>15</sup> Opocose ipo rese, ahe ramoseve sohi opĩtuhu ichui. Ocuerare, oñarapuha ava rese ohañeco ãgua.

*Jesús ombogüera setá ava imbaheasi vahe*

<sup>16</sup> Ipare pĩtu ramose setá carugar vireco vahe ogüeru yuvireco chupe. Jesús rumo ñepei reseve oñehe pĩpe tẽi omombopa carugar ava rehii sui, iyavei opacatu imbaheasi vahe ombogüera avei no. <sup>17</sup> Êgüe ehi omboaviye Tũpa ñehe mombehusar Isaías rembicuachiagüer aipo ehi vahe arac-ahe: “Ahe ae vırocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

*Oguata pota tẽi vahe ava Jesús rupi yuvireco*

<sup>18</sup> Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ãgua” ehi.

<sup>19</sup> Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

<sup>20</sup> Jesús rumo aipo ehi imboyevi chupe:

—Yavaira rumo ndeu. Esepia, v̄irai v̄ireco guaiti, iyavei aguara v̄ireco oquesa; che rumo, Ava Riquehir, ndarecoi que che r̄eta ité che p̄ituhu ãgua yepi —ehi.

<sup>21</sup> Ipare ñepeí ivoya aipo ehi chupe:

—Che Yar, che ru manore voi che nde rupiño ité aicora —ehi.

<sup>22</sup> —Aní, cūritei voi eyu che rupi —ehi—. Ēgüe tehiño ava secocuer omano vahe nungar, ahe ae toñeñeti yuvireco —ehi chupe.

*Jesús omombituhu iv̄itu ai, oh̄itu vahe avei*

<sup>23</sup> Ipare Jesús yuviroha güemimbohe reseve yuviraso carite pipe. <sup>24</sup> Ipa pipe yuviraso pucu ramoseve Jesús oque ou. Ahese aviyeteramo t̄ei iv̄itu ai op̄uha ipa pipe; i oh̄itu vahe ndiguaȳi eté, seni-seni carite oyopi. <sup>25</sup> Evocoyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande p̄isiro eve! —ehi yuvireco chupe.

<sup>26</sup> Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, iv̄itu ai upe avei no: “Pep̄ituhupa” ehi. Aheseve voi opa tupri op̄ituhu yuvireco.

<sup>27</sup> —¿Mara ehi rutei p̄iha co? —ehi t̄ei semimbohe yuvireco chupe—. ¿Mara ehi vahe p̄iha co ava secoi?

Esepia niha, iv̄itu, para guasu avei omboyeroya yuvireco no —ehi.

*Jesús omboyep̄ep̄ipa carugar Gadara pendar sui*

<sup>28</sup> Jesús oguataño güemimbohe eta reseve oye-pota ipa rovai Gadara ivi rese yuviraso. Aheve ñuvirío ava carugar vireco vahe yugüeru so-vaichi. Ahe ava tehögüer ruvipa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi. <sup>29</sup> Jesús repia ramoseve rumo, oñhe pĩrata yuvireco chupe aipo ehi:

—¡Jesús, Tũpa Rahĩr, eyepepi ore sui! Esepia niha, ndoyepota vitei ari nde ore mombaraisu ãgua oreu —ehi tēi yuvireco.

<sup>30</sup> Namombrĩmi cuchi rehĩ yuvirecoi ichui.

<sup>31</sup> Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

<sup>32</sup> —Aviye, peso —ehi carugareta upe.

Aipo hese, carugar opa yuvĩnose ava sui, yuvĩroique cuchi rehĩ avĩterve. Ipare rumo cuchi ndayaracua iri yuvireco; iivĩ socuer rupi yuvĩnoña yuviraso, opa ipa pipe ocañi tēi yuvireco.

<sup>33</sup> Yuvĩnoña evocoyase cuchi rãrosar tecuave yuviraso opacatu mbahe güembiepia mombehu ava upe yuvireco. <sup>34</sup> Ichui opacatu ava tecua pendar yuvĩnose ati Jesús upe, “¡Eso cohava sui!” ehi yuvireco chupe.

## 9

### *Jesús ombogüera ava ndoguatai vahe*

<sup>1</sup> Ipare Jesús oha carite pipe osasa iri ipa rovai oso güecua Capernaum ve. <sup>2</sup> Aheve, ava ndoguatai vahe omboyovai seraso imbaheasi vahe rĩru pipe yuvireco chupe. Ahe oicuase co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

<sup>3</sup> “¿Co mbia oyemboivate ai tēi vahe, Tūpa ñehe nungar pipe tēi oñehe!” ehi Moisés porocuita rese oporombohe vahe yuvireco chupe. <sup>4</sup> Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapisacasa rereco! <sup>5</sup> ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise, ‘Epñha, eguata’ hesa tie? <sup>6</sup> Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

—Epñha, esupi nde rupa seraso nde rētave —ehi.

<sup>7</sup> Ahese opñha voi, oso güētave. <sup>8</sup> “¿Too! ¿Mara ehi rutei vo?” ehi ava rehii yuvireco imboetisave. “Esepia, ahe niha ombou opñratasa ava upe” ehi yuvireco chupe.

### *Jesús, “Erio che rupi” ehi Mateo upe*

<sup>9</sup> Ichui osose Jesús, che repia, che Roma pendar mborerecuar guasu upe guarepochi rerocuasa mesave che rēise. Ipare aipo ehi cheu:

—Erio che rupi —ehi.

Evocoyase apñha, aso voi supi.

<sup>10</sup> Ahe ari pipeve Jesús güemimbohe reseve yuviroique che rētave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei. <sup>11</sup> Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pãhuve tẽi? —ehi seroĩrosa pipe yuvireco chupe.

<sup>12</sup> Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopõsano vahe; imbaheasi vaheño rumo oseca yuvireco.

<sup>13</sup> Peyapisaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavẽhepri tẽi’ ehi. Esepia, ndayui ava seco catupri vahe reca, ãgüe ehi rumo ayu ava angaipa viyar reca —ehi Jesús ava eta upe.

*Yecuacu rese ñehesa*

<sup>14</sup> Ipare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoiyase nde remimbohe eta ndoyecuacui yuvireco yepi? —ehi yuvireco chupe.

<sup>15</sup> Ahe rumo omboyevi ahe ava upe:

—¡Ndiyai eté ichohopri mendasave ndoyembovihai yuvireco imer oicovese ipãhuve! Oimera rumo ari imer reraso ãgua ichui curi. Ahese ramo oyecuacura yuvireco cute —ehi.

<sup>16</sup> “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoiyase tuvicha catu-catuño ité. <sup>17</sup> Iyavei ndiyai ava uva ricuer piasu oyapocatu siru mbahe pিরer cuacua vahe pipe. ãgüe ehise, mbahe pিরer opura viña, ocañi tẽira, uva ricuer avei evocoiyase ocañi tẽi aveira viña no. Acoi uva ricuer ipiasu vahe mbahe

pirer ipiasu vahe pipe yapocatupri rumo oyoya ndoyemomarai yuvireco” ehi.

*Jairo rayri iyavei cuña Jesús turucuar rese opoco vahe*

<sup>18</sup> Jesús oporombohe viteseve, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

<sup>19</sup> “Aviye” ehi. Evocoyase opūha yuviraso güemimbohe reseve supi. <sup>20</sup> Ahe pipeve cuña doce araviter rupi suvi ndopai vahe opoco saquicuei coti iturucuar popi rese. <sup>21</sup> Esepia, ahe aipo ehi opiha pipe: “Yepe que iturucuar popi resemi tēi apocora, acuerara rumo” ehi. <sup>22</sup> Jesús evocoyase oyemboyere cuña rese aipo ehi chupe:

—Che rayri, eyemopase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

<sup>23</sup> Oyepotase Jesús mborerecuar rētave, osepia omimbí vahe iyemoingatupase omano vahe tĩ āgua, ava yaseho atise avei no. <sup>24</sup> Ahese aipo ehi ava oyaseho vahe upe:

—Pesēpa cohava sui. Co cuñatai nomanoi; oque tēi ou —ehi.

Ahe ava rumo opucaete atiño seroyaēhisave yuvireco. <sup>25</sup> Ichui opa ava omose, ahese oique oi pipe oipopisi cuñatai. Evocoyase ahe oñarapuha voi. <sup>26</sup> Co sembiapo evocoyase oyandupa voi opacatu tecua rupi yuvireco.

*Jesús ombogüera ñuvirío ava ndasesapisoi vahe*

27 Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucái yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

28 Oi pīpe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ãgua rese peye? —ehi.

—Nde reroyasa ité, ore Yar —ehi yuvireco.

29 Aipo oyeupe hese, opoco sesa rese, aipo ehi chupe:

—Tayapo pe che reroyasa pīpe mbahe pēu —ehi.

30 Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

31 Ahe rumo ichui oyepēpi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

### *Jesús ombogüera niñhengatui vahe*

32 Ichiri ramoseve rumo, ambuae ava viroyepota ava niñhengatui vahe carugar rerecosar Jesús upe yuvireco. 33 Ichui omosese carugar, iñhengatu cute. Sepiasē opacatu ava,

—¡Too! —ehi—. ¡Ndasepiasai vahe ité co nungar mbahe yande recua pīpe yepi! —ehi tēi yuvireco.

34 Fariseo eta rumo aipo ehiño yuvireco:

—Carugar rerecur pīratasa pīpe co mbia omose carugar ava sui —ehi tupri tēi yuvireco chupe viña.

### *Jesús oiparaisuereco ava*

<sup>35</sup> Ichui opacatu tecua rupi Jesús oguata oporombohe tũparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tõi mbaherasisa sui avei no. <sup>36</sup> Osepiase ava rehî, oiparaisuereco yuvireco. Esepia, ahe oñemosañõ tõi mbahe rasicuer pãhuve inungar ovesa ndovirecoi vahe guãrosar yuvireco <sup>37</sup> Evocoyase aipo ehi güemimbohe upe:

—Supi eté mbahe miti imonuhapirã setá iteanga; sese oporaviqui vahe rumo moviromi tõi. <sup>38</sup> Sese peporandu mbahe miti Yar upe, ahe tomondo ava imonuha ãgua —ehi güemimbohe eta upe.

## 10

### *Jesús oiporavo doce tupri apóstol*

<sup>1</sup> Evocoyase, “Perio” ehi Jesús doce güemimbohe upe. Chupe omondo güeco pĩratasa carugar ava sui imboyepepi ãgua iyavei iporombogüera ãgua opacatu-catu tõi mbaherasisa sui.

<sup>2</sup> Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; <sup>3</sup> Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; <sup>4</sup> iyavei Simón, güecua rese secatēhi vahe pãhu pendarer; ipa vahe Judas Iscariote, ahe Jesús omondo vahe yamotarēhimbar upe.

*Jesús oyocuai güemimbohe Vu mborerecuasa mombehu ãgua*



5-6 Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ěgüe ehi tēi secocuer yuvireco. Evocoyase pesoī rene ndahei vahe judío recua rupi iyavei ndapeiquei chira tecua Samaria ve” ehi. <sup>7</sup> “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu. <sup>8</sup> Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei caruguar pemboyepipi serecosar sui. Esepia niha, peipisi pīratasa ndasepi vahe. Sese peyapoño evocoi mbahe guarepochi pisiēhisa pipe.

<sup>9-10</sup> “Ava oporaviqui pipe sui ocaru yepi. Sese ndaperasoī chira guarepochi peyese. Ndaperasoī chiaveira pe mbahe riru, iyavei ambuae pe turucuar, pe pītaqui; peyesendar güeraño tupri perasora. Pe pococa avei ndaperasoī chira” ehi.

<sup>11</sup> “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. <sup>12</sup> “Evocoyase peique ramoseve oi pipe, peyapora, ‘Avirave, Tūpa tape rovasa’ peyera chupe. <sup>13</sup> Acoi aviyese oi pipendar ava pēu, ahe oipisira Tūpa porovasasa; acoi ndahaviyese rumo ava, ndoipisi chira Tūpa porovasasa yuvireco. <sup>14</sup> Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. <sup>15</sup> Evocoyase supi eté arī cañi oyepotase co tecua upe, ivate

catura Tūpa ñemoirosa ava Sodoma, Gomorra iguar upendar sui curi” ehi.

*Yamotarēhiprira Jesús reroyasar*

<sup>16</sup> “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pãhuve. Sese peresaeté tuprira peyese mboi nungar, iyavei inungar apicasu seco tupri vahe peicora. <sup>17</sup> Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco, <sup>18</sup> ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei. <sup>19</sup> Acoi pe rerasose mborerecuar upe yuvireco, ‘¿Mbahe pñha amombehura chupe?’ ndapeyei chira; acoi peñehe potase rumo, Tūpa omondora pe ñehe āgua pēu. <sup>20</sup> Esepia, ndahei chira peyesui tēi peñehe, pe Ru Tūpa Espiritu pemoñehe ucara.

<sup>21</sup> “Ipare rumo ava vivri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese. <sup>22</sup> Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipĩsiropri yuvirecoira curi. <sup>23</sup> Iyavei acoi pe mañeco tēise ñepei tecuave yuvireco, ahese peyepipiñora ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye viteiseve pe guatasa judío recua rupi.

24 “Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. 25 Iyavei semimbohe, ‘Aviye ité’ ehiñora ombohesar osecoupitise. Êgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

*¿Uma sui p̄tha siquiyesara?*

26 “Sese ndapesiquiyei chira ava pe amotarẽhimbar sui. Esepia, yaposa vahe imombehupirẽhi cũritei, icuasaño itera curi; iyavei mbahe ñomipri, icuasaño aveira no. 27 Acoi che amombehu vahe p̄tumimbisave p̄u, pemombehu ari pipe coiye, iyavei acoi amombehu vahe p̄uñomi, perosapucaí pe r̄eta harive imombehu opacatu ava upe. 28 Iyavei ndapesiquiyei chira acoi ava peyuca potasar sui. Esepia, ndoicatu niha ava hã mocañi ãgua yuvireco. Tũpa sui rumo pesiquiye catura. Esepia, ahe oicatu yande retecuer, yande hã reseve imocañi ãgua tata guasu pipe” ehi.

29 “Yamondo niha ñuvirío v̄iraimi repirã ñepeimi guarepochi yepi. Yande Ru Tũpa ndoipotaise rumo, ndoviapi chietera que ñepei v̄iraimi” ehi. 30-31 “Sese pesiquiye eme. Esepia, pe niha ivate catu vahe ité peico opacatu v̄irai sui. Supi eté Tũpa niha oicua opacatu ñepeipei pe ha retacuer” ehi.

*“Che aicua Jesucristo” ehi vahe opacatu ava rovaque*

32 “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru ìva pendar upe. 33 Acoi ava ‘che ndahei Cristo rese aico’ ehi vahe rumo cheu ava rovaque, che avei evocoiyase, ‘Ndahei co che rupindar secoi’ ahera che Ru ìva pendar upe.

*Jesús reroyasa pipe sui oimera yeamotarēhisa*

34 “ ‘Mbahe tupri ai revo güeru co ìvi pipe’ ndapeyei chira cheu. Ëgüe ehi rumo che yusa omoime ucara yeamotarēhisa. 35-36 Sese ava oñemu ae oyeamotarēhi-rēhira yuvireco; ava oye-supā oyamotarēhira, iyavei cuña membri osi oyamotarēhira, cuña vovayar oyamotarēhi aveira.

37 “Iyavei acoi oyesupa tēi osaisu catu vahe che sui, ahe ndiyai eté secoi che voyarã; inungar avei osaisu catu vahe guahir, anise guayri che sui. 38 Iyavei acoi noñemosai vahe mbahe rasicuer upe, inungar-ra curusu rese ovosi vahe ité viña che rupi oguata pipe, ahe chupe ndiyai eté che voya seco āgua. 39 Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

*Porrecosa resendar ñehesa*

40 “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. 41 Acoi ava oipisi tupri vahe ambuae ava Tūpa ñehe mombehusar secosa rese, ahe oipisi aveira porrecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porrecosa inungar tupri. 42 Iyavei

acoi omondo vahe que chĩhi i sõhisa vahe que ñepeí seco mbegüemi catu vahe toihu che reroyasar seco rese, ahe oipisi aveira Tũpa suindar porerecosa” ehi.

## 11

*Juan Oporoãpiramo vahe ovoya omondo Jesús recocuer cua uca água*

<sup>1</sup> Opase Jesús oyocuai doce güemimbohe, ahese yuviraso oporombohe Tũpa Ñhengagüer rese judío recua rupi yuvireco.

<sup>2</sup> Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese <sup>3</sup> imboporandu água: “¿Nde ité vo Tũpa Rembiporavo aipo sãrombri ereico? anise, ¿oime tie ambuae orosãro vaherã?” ehi yuvireco chupe.

<sup>4</sup> Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe. <sup>5</sup> ‘Ndasesapisoi vahe osareco tupri cũritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsirosa resendar ñehesa’ peyera chupe. <sup>6</sup> ¡Oviharetera acoi ava oyeroyaño vahe che rese!” ehi Juan rupindar upe.

<sup>7</sup> Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porẽhisave capihiata ivitu ombova-mbova vahe nungar pĩha? <sup>8</sup> Anise, ¿pesepia tie iturucuar porañete ai vahe iyemboeteise?”

¡Aní! Êgüe ehi vahe rumo secoi mborerecuar guasu rêtave yepi. <sup>9</sup> Evocoyase pesepiase, ¿‘Ava’ peye vo pe chupe? ¿Tũpa ñehe mombehusar ité pĩha? Taa, ahe ité. Evocoi niha ivate catu vahe Tũpa ñehe mombehusar sui. <sup>10</sup> Ahe chupe ité Tũpa icuachiapri aracahendar pipe aipo ehi:

‘Che amondora nde renondeve che ñehe mombehusar nde raperã moingatũ ãgua’ ehi.

<sup>11</sup> Supi eté ndipoi que ñepei ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tũpa mborerecuasave rumo ava seco mbegüemi catu vahe ivate catu ichui.

<sup>12</sup> “Juan yusa suive tupri Tũpa povri pendar oiporara mbahe tẽi yuvireco. Osãha-sãha ava opĩratasa pipe imocañi ãgua. <sup>13</sup> Opacatu Tũpa ñehe mombehusar rembicuachia pipe, Moisés porocuita icuachiapri pipe avei imombehusa Juan yusa rupive co Tũpa mborerecuasa resendar.

<sup>14</sup> Yepe yavaira seroya ãgua pẽu viña, Juan rumo, Tũpa ñehe mombehusar Elías. Ahe imombehupri ou vahe. <sup>15</sup> Acoi ava osendu pota vahe che ñehe, toyapisacaño sese” ehi.

<sup>16</sup> “¿Mbahe rese pĩha amboyoyara ava recocuer cũriteindar? Esepia, co ava inungar acoi chĩhivahe iguayĩ tẽi vahe ocar rupi. Ipare oñehe pucu-pucu omboripar upe yuvireco aipo ehi: <sup>17</sup> ‘Oromoñehe tẽi mimbĩ pẽu, ndapepivoi eté rumo iyavei orosapucaĩ tẽi sapucaisa viharẽhisa resendar pẽu, pe rumo ndapeyasehoi eté’ ehi. <sup>18</sup> Esepia, ouse Juan Oporoãpiramo vahe, ahe ndohui tembihu sepĩrusu ai vahe iyavei ndoĩhui uva ricuer ipĩrata vahe, sese, ‘Co mbia caruguar viereco vahe oyese’ peye tupri tẽi chupe. <sup>19</sup> Coiye che ayu, Ava Riquehĩr,

acaru, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerocuasar mboripar tēi’ peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi” ehi.

### *Tecua ndiporeroyai vahe*

<sup>20</sup> Ahese Jesús oñehe pĩrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocuera Tūpa upe nara yuvireco. Evocoyase aipo ehi chupe: <sup>21</sup> “¡Peparaĩsu, ava tecua Corazín pendar! ¡Pe avei peparaĩsu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar arac-aheve anga omondera turucuar viharēhisa re-sendar, tanimbu avei omondora oãca rese oangai-pa mboasisa pipe yuvireco viña no. <sup>22</sup> Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. <sup>23</sup> Pe avei no, tecua Capernaum pendar pemoha co ivave pe reco ãgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cūrítei oime vitera ahe tecua viña. <sup>24</sup> Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye” ehi.

### *Peyu cheu mbĩtuhusa reca*

<sup>25</sup> Iyavei ahe ari pipe Jesús oyerure: “Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri

vahe ava imbahecua vai vahe sui; eremboyecua rumo ava seco mbegüemi vahe upe. <sup>26</sup> Ëgüe ere niha mbahe nde remimbotar apo, che Ru” ehi.

<sup>27</sup> “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupri. <sup>28</sup> Peyu cheu opacatu icuerai vahe. Che amondora pe pituhu ãgua. <sup>29-30</sup> Peico che povrive, peyembohe avei che sui. Esepia, che ndache reco asi, iyavei che povrive pe recosa ndayavaimi eté. Ahese ramo oimera mbituhusa pëu” ehi.

## 12

*Mbituhusa ari pipe Jesús remimbohe oipoho trigo yuvireco*

<sup>1</sup> Mbituhusa ari pipe Jesús yuviraso güemimbohe rese, oguata mbahe miti pähu rupi. Ahese semimbohe ndasiepoi. Evocoiyase trigo rãhi oipohopohomi güemihura yuvireco. <sup>2</sup> Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

<sup>3</sup> Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. <sup>4</sup> Ahe niha yuviroique ité tũparo pipe pan imboeteipri Tũpa upendar hu ãgua ondugüer reseve. Ahe chupe acoi ndipotasai



ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi. <sup>5</sup> ¿Ndapeyeroqui vo Moisés porocuita resendar pipe? Esepia, judío pahi tũparo rese hañecosar ndopituhui eté tũparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. <sup>6</sup> Cũritei cohave oime ava ivate catu vahe tũparo sui. <sup>7</sup> Evocoyase pe ndapesenducuai eté Tũpa Ñehengagüer aipo ehi vahe: ‘Che aipota peporoparisuereco, aní chira peropovêhepa porerecosa mbahe mimba tēi cheu’ ehi vahe. Pesenducuse viña, ahese, “Oyavi mbahe” ndapeye voi chira che remimbohe mbahe ndoyavi vahe upe viña. <sup>8</sup> Esepia, Ava Riquehir mbituhusa ari rereciar ité secoi —ehi fariseo eta upe.

*Mbia ipo nomii vahe Jesús ombogüera*

<sup>9</sup> Ichui osose Jesús, oique judío tũparove. <sup>10</sup> Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pñha mbituhusa ari pipe ava imbogüerasa yepi’ —ehi yuvireco chupe.

<sup>11</sup> Evocoyase Jesús aipo ehi imboyevi:

—¿Ava vo pe pñhu pendar acoi mbituhusa ari pipe oviapise seimba ovesa ivicuarve ndosoi chira senose viña? <sup>12</sup> ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

<sup>13</sup> Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva. <sup>14</sup> Evocoiyase fariseo opa yuvinose yuviraso oyemoingatu Jesús yuca ãgua yuvireco.

*Yaviye aracahendar imombehupri Jesús recocuer resendar*

<sup>15</sup> Evocoiyase Jesús oicuase fariseo pihañemoñetasa, osẽ oso, ava rehii avei yuviraso supi. Setá avei imbaheasi vahe ombogüera, <sup>16</sup> iyavei, “Che mombehui rene ava upe peyé” ehi. <sup>17</sup> Ëgüe ehi yaviyepa Tüpa ñehe mombehusar Isaías remimombehugüer:

<sup>18</sup> “Co ité che mboyeroyasar che rembiporavo.

Ahe asaïsu etepri.

Sese ité ayemboviha.

Amondora che Espíritu chupe.

Ahe omombehu aveira mbahe ihívi vahe opacatu ava ivi pipendar upe.

<sup>19</sup> Noiñehopoepi-epii chira ava, nasase-sasei tẽi chiaveira; iyavei ndosendui chietera ava iñehe ocar rupi.

<sup>20</sup> Iyavei nomopei chietera que ñepeï patavimi oyeapa vahe; nombogüei chiaveira tataendi sãtachiñomi tẽi vahe.

Ëgüe ehira mbahe ihívi vahe piïpe opacatu secopiïpa.

<sup>21</sup> Evocoiyase opacatu tecua pendar ava ndahei vahe judío oyeroyara yuvireco sese’ ehi Isaías aracahe.

*“Jesús vireco caruguar pĩratasa oyese” ehi tẽi ava yuvireco*

22 Ichui ava ndasesapısoi vahe, noñehei vahe caruguar rerecosar vıraso Jesús upe yuvıreco. Evocoyase Jesús ombogüera. Ahese osareco, oñehe avei. 23 Evocoyase opacatu ava oyepıhamondiısave aipo ehi yuvıreco: “¿Tũpa Rembiporavo David suindar pıha co?” ehi yuvıreco chupe.

24 Osenduse rumo fariseo, “Co mbıa caruguar rerecuar Beelzebú pıratasa pıpe tẽi omboyepı caruguar ava sui” ehi yuvıreco.

25 Oicuaño rumo ipıhañemoñetasa. Sese aipo ehi: “Que mborerecuar guasu povrı pendar ovavavase oyeupe oyeamotarẽhisave yuvıreco, ahese evocoi mborerecuar pıratasa ocañi tẽira. Iyavei que tecua pendar, anise, que ava omu rese ovavase oyeupe, oyoya oyemocañi tẽira yuvıreco. 26 Ëgüe ehi avei caruguar. Esepia, serecuar omboyepıse opovrı pendar, ovavara oyeupe yuvıreco viña. Evocoyase ahe oyemocañi tẽira yuvıreco. 27 Iyavei pe, ‘Beelzebú pıratasa pıpe sui tẽi omboyepı caruguar ava sui’ peye tẽi cheu. Evocoyase, ¿ava pıratasa pıpe vo pe voya eta omboyepı caruguar ava sui yuvıreco? Tũpa pıratasa pıpese, che avei evocoyase ayapo evocoi nungar ipıratasa pıpe. Pe voya ae omboyecuar pe ñehe pe rembiavi yuvıreco pẽu. 28 Che rumo Tũpa Espıritu pıratasa pıpe amboyepı caruguar ava sui. Sese cūrıtıeı pesepia ité Tũpa mborerecuasa.

29 “Iyavei no, que ava oique potase ambuae ava ipırata eteprı vahe rėtave imbahe rerocua ãgua ichui viña, yıpındar opa rane itera oñapıchi-pıchi. Ipare voi opara vırocua imbahe ichui.

<sup>30</sup> “Iyavei acoi ava ndache mboyoyai vahe, ahe che amotarêhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

<sup>31</sup> “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espíritu upe, ahe chupe ndipoi chietera ñeroisa. <sup>32</sup> Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espíritu amotarêhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

### *Ava recocuer icuasa sembiapo rese*

<sup>33</sup> “Emoatiro tupri ivira, ahe iha aviyera; nderemoatiro tupriise ivira, ahe evocoiyase virecora oha naporai vahe. Esepia, ivira icuasa iha rese. <sup>34</sup> ¡Evocoiyase pe, mboi nungar tēi peico vahe, pe recocuer naporaise, ndapeicatu chira mbahe aviye vahe rese pe ñehe água! Esepia, pe piha pipe sui tēi osē pe ñehe água. <sup>35</sup> Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tēi oñehe. <sup>36</sup> Sese ari cañi pipe opacatu ava opara omombehu oñehe-ñehe tēisa Tūpa rovai yuvireco. <sup>37</sup> Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

*Ava eta ndaseco pōrai vahe oporandu poromondiisa rese yuvireco*

<sup>38</sup> Evocoiyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua ãgua — ehi yuvireco.

<sup>39</sup> Jesús rumo omboyevî iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua ãgua rese. Che rumo namboyecuai chira ambuae poromondiisa; Jonás recocuer rese güeraño opomahenduhara. <sup>40</sup> Esepia, inungar Jonás secói mbosapî ari pira guasu aviterve aracahe, ãgüe ehi aveira Ava Riquehir mbosapî ari ivivrive taira omano vahe pãhuve. <sup>41</sup> Evocoiyase ari cañi pipe ava tecua Nínive pendar porandusave omombehura ava cūrteindar cañipa ãgua. Esepia, Nínive pendar niha omboasise oangaipa, oyeví Tūpa upe yuvireco Jonás omombehuse Tūpa Ñehengagüer chupe. Cūrteitei rumo oime Jonás sui aviye catu vahe pe pãhuve. <sup>42</sup> Iyavei ari cañi pipe cuña mborerecuar guasu irohî cotî secua vahe porandusave, omombehura cūrteindar ava cañipa ãgua. Esepia, ahe ou amombrî sui Salomón mbahecuaasa rendu ãgua. Cūrteitei rumo oime ivate catu vahe Salomón sui —ehi fariseo eta upe.

*Caruguar oyeví iri ava güeco agüerve*

<sup>43</sup> “Iyavei caruguar osēse ava sui, oguata tēi ivî ipiru vahe rupî opituhu ãgua reca. Ipare rumo ndoyosuise, ipihañemoñeta, <sup>44</sup> ‘Ayeví irira che reco agüerve vichó’ ehi. Aheve oyevíse, osepia iri secocuer inungar oî ndiporusai vahe, sahuvapri

tupri. <sup>45</sup> Sepiase, oso siete carugar naporai catu vahe reca. Ichui güeruse, oyoya guasu yuviroique co mbia pïha pipe. Sese mbahe tēi catu ité secocuer yipindar güeco agüer sui. Ëgüe ehi aveira ava cūrteindar ndaseco pōrai vahe upe” ehi.

*Jesús si, tivireta avei*

<sup>46</sup> Jesús oñehe viteseve ava upe, ahese ichi, tivireta reseve ocarve yuvinochai. Ahe oñehe pota yuvireco chupe. <sup>47</sup> Evocoyase mbia omombehu Jesús upe:

—Nde si, nde rivireta reseve co ocarve yuvinochai. Ahe oñehe pota yuvireco ndeu —ehi.

<sup>48</sup> Ahe rumo,

—¿Ava pïha che si; ava pïha che riviri? —ehi ahe mbia upe.

<sup>49</sup> Evocoyase omboyecua opo pipe güemimbohe eta aipo ehi:

—Co che si eta, co che rivireta. <sup>50</sup> Esepia, acoi che Ru ìva pendar remimbotar oyapo vahe, ahe che riviri, che reindri iyavei ahe che si yuvirecoi —ehi.

## 13

*Mbahe miti sui yembohesa*

<sup>1</sup> Ahe ari pipe Jesús osē oi sui oso, oguapi ìpa popive oĩ. <sup>2</sup> Aheve ava oñemonuha atise yuvireco, oha carite pipe oguapi oĩ, evocoyase opacatu ava opita ìpa popi rupi yuvireco. <sup>3</sup> Ahese omboyoyayoya oporombohesa setá mbahe rese aipo ehi:

“Ñepei mbia osē omaheti oico. <sup>4</sup> Ahe otiapi-apise mbahe rāhi oso, moviro oiti peri rupi. Vīrai ogüeyise rumo sese, opaño yuvirohu. <sup>5</sup> Iyavei moviro oiti ìvi nayanai vahesave ita pāhuve. Sese

cũriteimi sorĩ; <sup>6</sup> ari tasise rumo, opaño ipiru. Esepia, ndasapoi niha. <sup>7</sup> Iyavei ambuae mbahe rãhiĩ oitĩ yu pãhuve. Ahe yu rumo sorĩ poyava catu yuvĩreco ichui. Sese opaño oyopi. <sup>8</sup> Ambuae rumo oitĩ ivĩ aviye vahesave, ahe setá iha imonuhasa; ñepeĩ ihĩ sui osẽ cién iha, ambuae sui osẽ sesenta, ambuae sui treinta. <sup>9</sup> Acoi ava osenducua pota vahe che ñehe, toyapisacaño sese” ehi Jesús ava eta upe.

*¿Mahera pĩha co yembohesa imboyoyasa ambuae mbahe rese?*

<sup>10</sup> Ichui semimbohe eta oyemboya Jesús rese yuvĩreco mbahe rese oporandu ãgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi. <sup>11</sup> Jesús aipo ehi: “Pẽu rumo Tũpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. <sup>12</sup> Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui. <sup>13</sup> Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tẽĩ, ndosepiacuai rumo yuvĩreco iyavei osendu tẽĩ, ndosenducuai avei yuvĩreco no. <sup>14</sup> Na ehi yaviye Tũpa Ñehengagũer Isaías remimombehu:

‘Pe niha pesendu tẽira, ndapeicuai chira rumo;  
iyavei pesepia tẽira, ndapesepiacuai chira rumo.

<sup>15</sup> Esepia, evocoi ava eta upe yavai eté ipĩha pipe imbahe reroya ãgua, ndayapisai eté sendu potaẽhisave; ndoyemboesapisoi avei sepia potaẽhisave.

Esepia, ndosenducua potai opïha pïpe yuvireco cheu oyevï potaëhisave ombogüera ãgua' ehi Isaías aracahe.

<sup>16</sup> “Pe rumo perorivete ité sepiacuase, pesenducuaase avei no. <sup>17</sup> Supi eté setá Tūpa ñehe mombehusar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepiai eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

*Jesús omombehu yembohesa mbahe miti resendar*

<sup>18</sup> Ipare aipo ehi: “Peyapisaca omaheti vahe recocuer rese. <sup>19</sup> Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhiï ovïapi vahe peri rupi. Ipare rumo carugar ou chupe. Ahe ipïha pïpe osendu vahe Tūpa Ñehengagüer opa tupriño omocañi ichui. <sup>20</sup> Iyavei acoi mbahe rāhiï seitipri ita pāhuve, ahe inungar ava recocuer yipiño osendu vahe, oipisi vahe avei vorivetesä pïpe Tūpa Ñehengagüer. <sup>21</sup> Ipare rumo inungar co mbahe miti ndovirecoi vahe guapo ovïracua ãgua, ãgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūriteimi seroyaëhisave oyepipi ichui. <sup>22</sup> Acoi mbahe rāhiï seitipri yu pāhuve, ahe inungar ava osendu vahe Tūpa ñehe. Ipare rumo ahe ipïhañemoñeta catu saïsusave opacatu ombahe eta co ivi pïpendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté,



inungar mbahe miti ndihai vahe. <sup>23</sup> Acoi itĩsa vahe mbahe rãhiĩ ivi aviye vahe rese, ahe inungar ava osenducua vahe Tũpa Ñehengagüer. Iyavei inungar acoi co mbahe miti ihá iteanga vahe, ãgüe ehi avei ava secocuer aviye vahe inungar ñepeí-peí sãhiĩ sui osẽ que cien iha, sesenta iha, anise que treinta” ehi Jesús güemimbohe eta upe.

*Trigo pãhuve caha naporai vahe sui yembohesa*

<sup>24</sup> Jesús omombehu iri co ambuae mbahe rese yembohesa oyoya vahe: “Tũpa mborerecuasa oyoya tupri ava oivi pipe mbahe rãhiĩ oñoti vahe rese. <sup>25</sup> Opacatu ava queseve rumo oyepota yamotarẽhisar, caha tẽi rãhiĩ oñoti trigo pãhuve oso. <sup>26</sup> Acoi trigo iha potase, supive avei sorĩ caha. <sup>27</sup> Evocoyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rãhiĩ aviye vahe ereñoti nde ivi pipe? ¿Que sui ru caha sorĩ ipãhuve?’ ehi yuvireco chupe. <sup>28</sup> Iyar rumo aipo ehi chupe: ‘Oime revo que che amotarẽhisar’ ehi. Evocoyase oporaviqui vahe oporandu yuvireco chupe: ‘¿Ndiyai pĩha caha tẽi orosapohopara ichui viña?’ ehi. <sup>29</sup> Ahe rumo aipo ehi chupe: ‘Aní, aviyeteramo caha rupive pesapoho tiẽtera trigo’ ehi. <sup>30</sup> ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaíra oporaviqui vahe caha tẽi rane rerocua ãgua imboapuha uca sapi. Ipare oyapocatura trigo rãhiĩ che mbahe apocatusave yuvireco’ ehi ivi yar” ehi Jesús.

*Yembohesa mostaza rãhiĩ suindar*

<sup>31</sup> Jesús omombehu iri co ambuae mbahe rese yembohesa oyoya vahe: “Tũpa povri pendar oyoya tupri mostaza rãhi rese. Ahe mbia oñoti vahe oivi pipe. <sup>32</sup> Supi eté co mostaza rãhi tahimi catu opacatu ambuae mbahe rãhi sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sãca rese vırai rehi oyapo guaitirã” ehi oporombohe.

*Yembohesa pan mboapeposa sui*

<sup>33</sup> Ipare Jesús oporombohe iri ambuae mbahe rese aipo ehi: “Tũpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo ãgua yepi” ehi oporombohe.

*Jesús oiporu oporombohe ãgua mbahe rese mboyoyasa yepi*

<sup>34</sup> Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. <sup>35</sup> Co rumo na ehi Tũpa ñehe mombehusar rembicuachiagüer aviye ãgua:

“Che añehese, amboyoyara che porombohesa ambuae mbahe rese. Iyavei amombehura Tũpa ivi apo suive mbahe nıporẽhi vahe” ehi.

*Jesús omombehu tupri oporombohesa caha tẽ resendar*

<sup>36</sup> Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvıreco sese ‘tomombehu trigo pãhuve caha oime vahe resendar yandeu’ oya. <sup>37</sup> Evocoyase omboyevi chupe: “Acoi ava mbahe rãhi aviye vahe oñoti

vahe, ahe che, Ava Riquehir. <sup>38</sup> Ivi mbahe miti rupa, ahe ava co ivi pipendar. Iyavei mbahe rāhii aviye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe. <sup>39</sup> Acoi yamotarēhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai iva pendar yuvireco. <sup>40</sup> Iyavei inungar acoi caha tēi imonuhapri sapi āgua, ēgüe ehi aveira ari cañi pipe coiyé. <sup>41</sup> Evocoyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tēi aposar avei reroqua āgua che povrive yuvirecoi vahe pāhu sui. <sup>42</sup> Ichui omondopara tata guasuve. Aheve oyaseho tēira iyavei ombotere-tere tēira guāi yuvireco. <sup>43</sup> Aheseve voi ava Tūpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

### *Mbahe repirusu ñomimbri sui yembohesa*

<sup>44</sup> “Evocoyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesa pipe opacatu ombahe omondopa co ivi reroqua āgua mbahe sepirusu vahe pota raisa pipe” ehi.

### *Mbohír sepirusu catu vahe sui yembohesa*

<sup>45</sup> “Iyavei Tūpa mborerecuasa inungar ava mbahe reroquasar oseca vahe mbohír icatupri vahe yepi. <sup>46</sup> Ahe oyosuse mbohír sepi catu vahe,

oso opacatu ombahe mondo co sepi catu vahe reroqua ãgua.

*Pira mbohasa sui yembohesa*

<sup>47</sup> “Iyavei Tũpa mborerecuasa inungar pira mbohasa. Imondopri ipive. Ipare omboha opacatu-catu tẽi pira. <sup>48</sup> Acoi savapipose pira mbohasa, vinose ivi ãtasave yuvireco. Aheve oiporavo pira aviye vahe oñõña ombahe riruve yuvinoi, naporai vahe rumo opaño omombo yuvireco. <sup>49</sup> Ëgũe ehi aveira ari cañi pipe: ahese Tũpa rembiguai iva pendar yuvinosera opacatu ava ndaseco põrai vahe mboyepepi ãgua ava seco catupri vahe sui. <sup>50</sup> Evocoyase ava ndaseco põrai vahe imondosara tata guasuve. Aheve oyaseho tẽira iyavei ombotere-tere tẽira guã yuvireco” ehi.

*Mbahe ipiasu vahe iyavei ocuacua vahe sui yembohesa*

<sup>51</sup> Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

<sup>52</sup> Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

*Jesús Nazaret ve secoi*

<sup>53</sup> Oñehe pare, Jesús osẽ ichui <sup>54</sup> oyepota güecuave oso. Aheve ombohe ava judío tũparo pipe oico. Evocoyase ahe pendar ava oyepihamondi tẽi:

—¿Que p̄ha co ava oyembohe catu ombahe-  
cua āgua? iyavei, ¿mara ehi p̄ha co mbahe  
poromondiisa apo? —ehi yuvireco—. <sup>55</sup> ¿Ndahei  
vo acoi carpintero rahir t̄i? Ichi niha acoi María,  
iyavei yuvirecove tivri, ahe Santiago, José, Simón,  
Judas. <sup>56</sup> Seindri avei niha yuvirecove yande  
p̄ahuve. Evocoyase, ¿que p̄ha oyembohera viña?  
—ehi t̄i yuvireco chupe.

<sup>57</sup> Ip̄pe sui ndoviroyai yuvireco. Ahe rumo aipo  
ehi chupe:

—T̄upa ñehe mombehusar niha omboetei  
opacatu rupi yuvireco yepi. Secua p̄ipendar,  
s̄eta p̄ipendar ae rumo nomboetei yuvireco —ehi.

<sup>58</sup> Evocoyase, ahe ava viroyaēhisa rese, moviro  
t̄i oyapo mbahe poromondiisa ip̄ahuve.

## 14

### *Juan Oporoāpiramo vahe mano agüer*

<sup>1</sup> Ahe ari rupi Herodes, mborereciar  
guasu Galilea pendar, oyandu Jesús rerācua.

<sup>2</sup> Evocoyase aipo ehi op̄it̄ivisar upe: “Juan  
Oporoāpiramo vahe revo ocuerayevi. Sese oyapo  
poromondiisa ip̄rata vahe” ehi.

<sup>3</sup> Esepia niha, yip̄indar Herodes Juan oip̄isi,  
oñap̄ichi carena pipe soquenda āgua vivri Felipe  
rembireco Herodías sui t̄i, <sup>4</sup> “Ndiyai eté nde rem-  
bireco nungar ererecora” oyeupe hese.

<sup>5</sup> Herodes oyuca pota Juan viña, osiquiyēño  
rumo ava eta sui. Esepia, ahe, “T̄upa ñehe  
mombehusar secoi” ehi yuvireco chupe. <sup>6</sup> Acoi  
Herodes haragüer mboeteisa pipe rumo aipo cuña

Herodías membri osẽ opıvoı ava rehi rembiepi-ave. Herodes upe evocoyase aviye ai eté. <sup>7</sup> Sese ahe oyemoingatu ñepeı reseve que mbahe oyeupe oporanduse imondo ãgua chupe. <sup>8</sup> Evocoyase ahe cuñataı oyeupe osı remimombehu rupi, aipo ehi Herodes upe:

—Embou Juan Oporoãpiramo vahe ãca poratu pıpe cheu —ehi.

<sup>9</sup> Aipo ñehesa nombovıhai eté Herodes; ndiya iri rumo, “Anı” ohe ãgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. <sup>10</sup> Ahese oporocuai Juan ãca hasia ãgua soquendasave. <sup>11</sup> İpare vıraso poratu pıpe cuñataı upe yuvıreco. Evocoyase ahe omondo osı upe.

<sup>12</sup> Ahese Juan remimbohe oyepota yugüeru, vıraso sete ñoti yuvıreco. İpare yuvıraso Jesús upe imombehu.

### *Jesús oyopoi cinco mil cuimbahe*

<sup>13</sup> Jesús oyanduse Juan manosa, ahese ahe ae oso ava porẽhisave carite pıpe. Ava rehi rumo oyanduse, yuvınose voi güecua sui, ivı rupi yuvıraso osupiti secosave yuvıreco. <sup>14</sup> Evocoyase osẽse carite pıpe sui, osepia ava rehi. Ahese oıparısuereco ava eta. Sese opa ombogüera imbaheasi vahe serasoprı. <sup>15</sup> Evocoyase caharuse semimbohe oyemboya yuvıreco sese aipo ehi:

—Caharú ité moco cute iyaveı ndipoi oı co rupivemi vahe. ¿Ndiyai vo eremondopa ava tecua-tecuami rupi, ahe supı tovírocua mbahe güemihura yuvıreco? —ehi yuvıreco chupe.

16 —Aní, ndiyai yuviraso. Pe pemondora mbahe semihura yuvireco —ehiño chupe.

17 —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

18 —Peruño ave cheu —ehi güemimbohe upe.

19 Ipare aipo ehi ava rehi upe: “Peguapi capihi harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco.

20 Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco. 21 Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

### *Jesús oguata i hari rupi*

22 Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. 23 “Aviye” ohe pare ava upe, oyeupi oso ahe ae ivitri rese oyeroqui ãgua. Pītuse chupe, opitaño aheve. 24 Aheseve carite oso pucuse ipa popi sui, ivitu ipirata vahe osovañchi yuvireco. Sese ohitu vahe nambegüembegüei ocua sese. 25 Cõhe potase, oguata i hari rupi oso güemimbohe coti. 26 Semimbohe i hari rupi iguatase, oyembosiquiye yuvireco ichui. Sese,

—¡Ndahei vo evocoi hägüer secoi! —ehi yuvireco chupe.

27 Güemimbohe upe rumo aipo ehi:

—¡Peyemoviracuaño, che tēi! ¡Pesiquíye eme che sui! —ehi.

<sup>28</sup> —Che Yar —ehi Pedro—. Nde ité ereicose, taguata i hari rupi vicho nde piri —ehi.

<sup>29</sup> —Erio ru —ehi chupe.

Evocoyase Pedro ogüeyi carite pipe sui, uguata i hari rupi. Osora ipiri viña. <sup>30</sup> Ivitu pĩrata repiase rumo, osiqüiye ichui. Oso senise rumo ipive,

—¡Che Yar! ¡Che pĩsiromi eve! —ehi.

<sup>31</sup> Ahese cūriteimi voi oipisi Pedro po rese, aipo ehi chupe:

—¡Chĩhi tēi ereyeroya che rese! ¡Mahera ndereyeroya tuprii che rese! —ehi.

<sup>32</sup> Oyuvirohase rumo carite pipe, opituhu voi ivitu. <sup>33</sup> Evocoyase carite pipe yuvirecoi vahe oñenopiha sovai,

—¡Supi eté catu nde Tūpa Rahir ereico! —ehi yuvireco chupe.

*Jesús ombogüera imbaheasi vahe Genesaret pendar*

<sup>34</sup> Osasase ipa, oyepota Genesaret ivi rese yuviraso. <sup>35</sup> Opacatu ahe pendar ava oicuase Jesús yepota, ahese opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe, <sup>36</sup> aipo ehi yuvireco: “Topocomi tēi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

## 15

*Porombohesa yande mboangaipa vahe resendar*



<sup>1</sup> Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

<sup>2</sup>—¿Mahera vo nde remimbohe ndoguatai yande ramoí aracahendar aracuasa rupi yuvireco? ¿Mahera vo yande porocuita mboavíyeēhisa pipe ndoyepoi ocaru āgua yuvireco yepi? —ehi.

<sup>3</sup> Jesús omboyeví aipo ehi chupe:

—Pe no, ¡mahera ndapemboyeroyai Tūpa porocuita pe ramoí aracahendar aracuasa rupi tēi pe guata āgua! <sup>4</sup> Esepia, Tūpa aipo ehi: “Pemboyeroyara iyavei peipītivira pe ru, pe sí avei no. Acoi iñehe mara vahe oyesupa upe, ahe tomanoño” ehi aracahe. <sup>5</sup> Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua pēu. Esepia, che opacatu mbahe areco vahe imondopri Tūpa upe’ ehise, <sup>6</sup> ahese ndiyai eté ipītiví āgua chupe” peye. Ēgüe peye pe aracua raisa pipe pemocañi Tūpa porocuita peyesui. <sup>7</sup> ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracahendar omombehu pe recocuer:

<sup>8</sup> ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

<sup>9</sup> Oyerure tupri tēi yuvireco cheu.

Esepia, iporombohesa ava porocuita tēi’ ehi Isaías rembicuachiagüer pipe aracahe —ehi Jesús imombehu.

<sup>10</sup> Ipare,

—Perio —ehi ava rehii upe—. Peyapisaca, pependucua tupri che ñehe: <sup>11</sup> mbahe oique vahe ava yuru rupi nomboangaipa ucai. Mbahe osẽ vahe ava yuru pipe sui, ahe rumo omboangaipa uca —ehi.

<sup>12</sup> Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

<sup>13</sup> Ahe rumo aipo ehi chupe:

—Opacatu mbahe miti ndahei vahe che Ruiva pendar remiti, opara sapohosa curi —ehi—.

<sup>14</sup> Ëgüe tehiño yuvireco. Esepia, evocoi inungar ndasesapiso vahe viroguata ambuae ava ndasesapiso vahe yuvireco. Ahe evocoyase oyoya voira oviapi ivicuar pipe yuviraso —ehi.

<sup>15</sup> Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

<sup>16</sup> —¿Ndapesenducua vitei avei catu pe co ñehesa?

<sup>17</sup> ¿Ndapeicuai vo opacatu mbahe acoi ava yuru rupi oique vahe osõ yaviterve, ipare osẽ setecuer sui? <sup>18</sup> Ava pihanemoñetasa sui osẽ vahe rumo iyuru rupi, ahe ava omboangaipa. <sup>19</sup> Esepia, ava pihanemoñetasa sui osẽ pihanemoñeta raisa, porapichisa, mendasa sui yemboaguasasa, nomendai vahe yemboaguasa tẽisa, mondasa, temira iyavei ava rese ñemoñeta tẽisa. <sup>20</sup> Evocoi nungar mbahe rumo omboangaipa ava; ndahei angaipa acoi yande caru renonde yande yepoiẽhisa nungar —ehi.

*Cuña ndahei vahe judía viroya Jesús*

<sup>21</sup> Ichui osē Jesús oso, oguata Tiro ivi rupi, Sidón ivi rupi avei. <sup>22</sup> Cuña cananea, Tiro, Sidón ivi rese secói vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco caruguar oyese! —ehi pucu-pucu ou chupe.

<sup>23</sup> Ahe rumo nomboyevei eté chupe. Evocoyase semimbohe oyemboya yuvireco sese aipo ehi:

—Emboyepepi co cuña yande sui. Esepia, sãse pucu-pucu ou yande raquicuei —ehi yuvireco chupe.

<sup>24</sup> Evocoyase aipo ehi güemimbohe upe:

—Che Ru Tũpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

<sup>25</sup> Ahe cuña rumo oñenopiha sovai, aipo ehi chupe:

—¡Che Yar, che pĩiviimi eve! —ehi.

<sup>26</sup> Ahe rumo aipo ehi chupe:

—Naporai rumo yarocua pan tahir sui cave tohu yamondo vaheñã —ehi.

<sup>27</sup> —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

<sup>28</sup> —¡Cuña, tuvichá nde yeroyasa! Aviye, ěgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

### *Jesús setá ombogüera ava imbaheasi vahe*

<sup>29</sup> Ichui Jesús osē oso ipa Galilea ivi. Ipare oyeupi ivitri rese uguapi oĩ. <sup>30</sup> Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapisoi vahe, ipãri-pãri

vahe, niñhengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. <sup>31</sup> Ichui ava niñhengatui vahe oñehe; ipãri-pãri vahe ocuera tupri; ndoguatai vahe oguata avei iyavei ndasesapisoï vahe osareco yuvireco. Sepiase ava rehi oyepihamondiï aipo ehi: “Imboeteipri Israel Tũpa tasecoi” ehi yuvireco.

*Jesús oyopoi cuatro mil cuimbahe*

<sup>32</sup> Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sêtave sie porêhi reseve amondo. Aviyeteramo oviroviapi-api tiêtera tieporêhi peri rupi yuvireco viña —ehi.

<sup>33</sup> Evocoyase semimbohe aipo ehi yuvireco chupe:

—¿Que sui pïha orosecara tembihu ava rehi upe nara cohava ava porêhisave viña? —ehi yuvireco.

<sup>34</sup> —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

<sup>35</sup> Evocoyase, “Peguapi ivi harive” ehi ava rehi upe. <sup>36</sup> Ahese oipisi siete pan, pirami reseve, “Aviye ndeu” ehi Vu upe. Ichui omboyahoyaho güemimbohe upe imondo. Ahe evocoyase omondopa ava rehi upe yuvireco. <sup>37</sup> Opacatu ava ocaru vahe ihitaro yuvireco. Ipare semimbohe omboapipo iri rane sumbirer siete iruova yuvireco. <sup>38</sup> Cuimbahe ocaru vahe retacuer cuatro mil. Cuña, chïhivahe retacuer rumo ndicuasai.

<sup>39</sup> Ipare Jesús, “Aviye” ehi ava upe, ahese oha carite pipe oso ivi Magadán rupi.

## 16

*Fariseo iyavei saduceo oporandu poromondiisa rese yuvireco*

<sup>1</sup> Fariseo iyavei saduceo yuviraso Jesús repia secoãha ãgua yuvireco viña. “Emoporēhi Tūpa suindar nde recosa poromondiisa pipe oreu” ehi yuvireco chupe.

<sup>2</sup> Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pĩrá iteanga’; <sup>3</sup> iyavei añihivei: ‘Co pipe ari naporai chira. Esepia, iva rese pĩra vai anga, pĩtu guasu-guasú avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oyapave co poromondiisa cūruteindar ava upe imombehu. <sup>4</sup> Co ava ndaseco pōrai vahe oyepēpi vahe Tūpa sui oporandu poromondiisa rese ‘¿Tūpa suindar ité pĩha?’ oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri asevara chupe” ehi.

Ichui oseyapaño ava rehii oso.

*Fariseo iyavei saduceo porombohesa inungar pan mboapeposa*

<sup>5</sup> Evocoyase semimbohe oyepota ipa rovai yuviraso. Pan sui rumo sesarai eté yuvireco.

<sup>6</sup> Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui—ehi.

<sup>7</sup> Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

<sup>8</sup> Ahe rumo oicua güemimbohe pñañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese! <sup>9</sup> ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase?

<sup>10</sup> ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer?

<sup>11</sup> ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

<sup>12</sup> Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

*Pedro oicua uca Jesús Tũpa Rembiporavo secose*

<sup>13</sup> Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

<sup>14</sup> Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”;

anise ambuae ava, “Tũpa ñehe mombehúsar mboetasa” ehi yuvireco ndeu —ehi.

15 —Pe no, ¿‘Ava co secoi’ peye ru pe cheu no? —ehi güemimbohe upe.

16 —Nde niha Tũpa supi eté vahe Rembiporavo imombehupri; Tahir ité ereico —ehi Simón Pedro.

17 —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—

. 18 Nde Pedro ereico, co ita guasu harive amopuhara che tũparoguã. Ñepe yepe manosa ndosecoreroyi chietera opiratasa pipe. 19 Evocoyase che amondo Tũpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Aní” erese que mbahe uve co ivi pipe, ãgüe ehi aveira ivave —ehi.

20 Ipare Jesús aipo ehi güemimbohe upe: “ ‘Co Tũpa Rembiporavo Poropisrosar’ peye eme ava upe cheu” ehi.

### *Jesús omombehu omano ãgua*

21 Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve juicio rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. 22 Pedro rumo viraso co cotimi chupe oñehengata ãgua:

—¡Tũpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

<sup>23</sup> —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

<sup>24</sup> Ipare aipo ehi güemimbohe upe:

—Acoi uguata pota vahe che rupi, tasesarai mbahe güemimbotar aposa sui iyavei inungarra curusu rese ovosira viña, toyemoingatu voi che recocuer rese oparaisu āgua iyavei toguata tupri che rupi. <sup>25</sup> Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisiora.

<sup>26</sup> Esepia, ¿aviye ai angahu pīha ava upe opacatu mbahe co ivi pipendar pisi āgua, ahe ae tēi omocañise güecocuer yuvireco viña? ¿Mbovi pīha omondora ava güecocuer repirā viña? <sup>27</sup> Esepia che, Ava Riquehir, ayevira che Ru reco pīratasa pipe che rembiguai iva pendar reseve curi. Che evocoyase aicuara ñepeipei ava rembiapo agüer rupi chupe.

<sup>28</sup> Supi eté oimera amove cohava ava nomano vitei chivaherā, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

## 17

### *Jesús ñecuñaro agüer*

<sup>1</sup> Seis ari pare Jesús vīraso Pedro, Santiago, tivri Juan reseve co coti ivitri ivate vahesave oyeupi.

<sup>2</sup> Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar morochí, sendi avei. <sup>3</sup> Aheseve voi oyemboyecua Moisés, Elías reseve yuvireco chupe. Ahe



oñemoñeta oyeupe yuvinoha. <sup>4</sup> Ahese Pedro aipo ehi chupe:

—Che Yar, javiye ai eté cohave yaico! Ereipotase, ayapora mbosapi teyupami: ñepeu ndeu nara, ambuae Moisés upe, ambuae evocoyase Elías upe nara —ehi.

<sup>5</sup> Aviyeteramo tēi iva quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu ñehe rese” ehi vahe.

<sup>6</sup> Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui.

<sup>7</sup> Ahese oyemboya oso güemimbohe rese, oñatoi aipo ehi chupe:

—Pepūha; pesiquiyei rene —ehi.

<sup>8</sup> Evocoyase omahe yuvireco sese, ahese ahe güeraño osepia imoha yuvireco.

<sup>9</sup> Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeu ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

<sup>10</sup> Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

<sup>11</sup> Evocoyase omboyevi güemimbohe upe aipo ehi:

—Elías rane ité niha oura opacatu mbahe moin-gatu água curi. <sup>12</sup> Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe

ahe aveira niha cheparaisura ahe ava povrive vichico —ehi.

<sup>13</sup> Evocoyase semimbohe osenducua ramo ñehe yuvireco. Ëgüe ehi Jesús oñehe Juan Oporoãpiramo vahe rese.

*Jesús ombogüera chñhivahe carugar rerecosar*

<sup>14</sup> Viroyepota Jesús güemimbohe ava rehısive seraso. Aheve mbıa oyemboya oso sese, oñenopiha sovai aipo ehi chupe:

<sup>15</sup> —Che Yar, ereiparaısuerecomi tẽira che rahır cheu viña. Esepia, ahe ipiha mbaheası vahe, oye-mombaraısú iteanga. Setá yupagüer ovıapi tatave, ıve avei no. <sup>16</sup> Sese aru tẽi nde remimbohe upe. Nombogüera catui rumo yuvireco —ehi.

<sup>17</sup> —¡Too, ndapeyeroya tuprı vıteı eté che rese! ¡Co coti tẽi vite pe pihañemoñetasa! ¡Mbovi rupi rutei vo aico vıtera pe pãhıve che ñemosasa pipe! Peru evocoi chihivahe cheu —ehi.

<sup>18</sup> Ahese oñehe pırata carugar upe chñhivahe sui imose. Aheseve ocuera tuprı voi eté.

<sup>19</sup> Ipare semimbohe oporandu co cotımi yuvireco chupe:

—¿Mahera pıha ndoromose catui eté carugar ichui? —ehi yuvireco.

<sup>20</sup> —Esepia, ndapeyeroya tuprı Tũpa rese. Supi eté sese pe yeroyasa, yepe ndoyavıi chira mostaza rãhiı tahimi vahe viña, aipo peyera co ıvıtri upe: ‘Esıri, eso coi coti’ peyera. Evocoyase ıvıtri osiriño itera. Ahese ndapemboavaimi chira mbahe.

<sup>21</sup> Evocoi nungar carugar imosesa yayerurese yande yecuacusa pipe —ehi.

*Jesús omombehu iri omano ãgua*

<sup>22</sup> Jesús oguata viteseve Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarêhimbar povrive. <sup>23</sup> Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

*Jesús omondo guarepochi tūparo uve nara oyeupe oporandu vahe upe*

<sup>24</sup> Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondoï guarepochi tūparo upe nara? —ehi.

<sup>25</sup> —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo vïrocua guarepochi mborerecuar guasu co ivi pipe yepi? ¿Omu sui pñha, ambuae ava sui tie? —ehi.

<sup>26</sup> Pedro evocoyase omboyevï chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepi chira yuvireco —ehi—

. <sup>27</sup> Guarepochi rerocuasar moñemoïroēhi ãgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepeï guarepochi. Ahe eraso chupe. Ipipe iyacatura imboepi ãgua yandeu —ehi Jesús Pedro upe.

# 18

*¿Ava vo seco ivate catu vahe?*

<sup>1</sup> Ahe arí pipeve semimbohe oyemboya Jesús rese yuvireco mbahe rese oporandu água chupe:

—¿Uma vo seco ivate catu vahe Tūpa mborerecuasa pīpendar? —ehi.

<sup>2</sup> Evocoyase Jesús: “Erio” ehi ñepei chīhivahemi upe, omondo güemimbohe pāhuve imoha, <sup>3</sup> aipo ehi:

—Supi eté, acoi ndapeñecuñaroise iyavei ndapeicoise chīhivahemi nungar, ahese ndapeiquei chira Tūpa mborerecuasa pīpe. <sup>4</sup> Acoi oñemomini vahe rumo inungar co chīhivahemi, evocoi nungar seco ivate catura Tūpa mborerecuasave. <sup>5</sup> Acoi ava oipisi vahe co chīhivahemi nungar che rer pīpe sereco, che ité che pisi yuvireco —ehi.

*Iparaísu itera ava oporomboangaipa uca vahe*

<sup>6</sup> “Acoi que ava rumo omboangaipa uca vahe co chīhivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pīpe imombo água. <sup>7</sup> ¡Iparaísu co ivi pīpendar che reroyasar omboangaipa uca vahe yuvireco! Che reroyasar upe rumo oimeño itera poroãtoisa yepi, jahe imboangaipa ucasar rumo iparaísu itera!

<sup>8</sup> “Sese inungar pe po, anise que pe pi avei pemboangaipa uca vahe, peyasía, pemombora amombri peyesui viña. Esepía, aviye catu peiquera tecove apirēhisave ñepei pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. <sup>9</sup> Iyavei pe resa pe mboangaipa ucase, penose, pemombo amombri

peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

*Porombohesa ovesa ocañi tēi vahe resendar*

<sup>10</sup> “Peroĩroi rene que ñepeí chĩhivahemi che reroyasar. Esepia, ivave sembiguai che Ru pĩrindar ité yuvirecoi yepi” ehi. <sup>11</sup> “Che niha, Ava Riquehir, ayu ava ocañi tēi vahe pĩsiro āgua.

<sup>12</sup> “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepeí ichui viña, evocoyase oseyá ranera noventa y nueve tēi vahe ovesa ivitri rese. Oyevira ocañi vahe reca oso. <sup>13</sup> Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. <sup>14</sup> Ēgüe ehi avei che Ru ivave secoi vahe, ndoipotai eté que ñepeí ava che reroyasar chĩhivahemi nungar cañi āgua” ehi.

*Porombohesa yande ñero āgua rese*

<sup>15</sup> “Acoi nde mboetasa Tũpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. <sup>16</sup> Nande reroyaise rumo, ahese ereñehera ñepeí, anise ñuvirío ava upe nde pĩtivii āgua rese. Ahe avei tosendu pe ñehe. Ahese oimera que ñuvirío, anise mbosapi sendusar. <sup>17</sup> Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tēi aposar, ēgüe peye sereco” ehi.

18 “Supi eté acoi, ‘Aviye’ peyese que mbahe upe co ivi pipe; ãgüe ehi aveira ivave. Iyavei co ivi pipe, ‘Aní’ peyese que mbahe upe, ãgüe ehi aveira ivave.

19 “Iyavei co amombehu potami avei pëu: Acoi ñuvirío co ivi pipe pe pihañemoñetaso oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pëu. 20 Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipãhuve” ehi.

21 Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tẽi cheu oyapose? ¿Siete yupagüer rupi pĩha? —ehi.

22 —¡Aní! —ehi—. ¡Setenta rupi siete oyupagüer! —ehi Pedro upe.

### *Yembohesa ava niñero potai vahe resendar*

23 “Tũpa mborerecuasa inungar mborerecuar guasu omoingatu pota vahe güembiguai revesa chupe. 24 Evocoyase omboipi imoingatu ãgua, ahese ipĩtiviisar güeru ireve ati catu vahe guarepochi rese chupe. 25 Ahe rumo ndovirecoi imboepi ãgua. Sese co mborerecuar oyocuai opĩtiviisar aipo ehi: ‘Timondopasa co che rembiguai sem-bireco reseve, tahir iyavei opacatu mbahe vireco vahe reseve irevesa mboepipa ãgua cheu’ ehi. 26 Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tẽi cheu. Opara niha amboepi ndeu’ ehi chupe. 27 Ahese oiparisuereco, opoi irevesa sui.

28 “Aheseve voi rumo sembiguai osẽse, osepia ambuae ondugüer oyeupe ndaseta tuprii vahe

ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi. <sup>29</sup> ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. <sup>30</sup> Niñero potai eté rumo. ‘Tomboepipa rane ité orevesa cheu’ ehi soquenda uca. <sup>31</sup> Osepiase rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. <sup>32</sup> Evocoyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu. <sup>33</sup> ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. <sup>34</sup> Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’ oyapave. <sup>35</sup> “Indó, evocoyase ãgüe ehi aveira che Ru iva pendar pëu ndapeñeroise ité peyeupe” ehi Jesús güemimbohe upe.

## 19

### *Jesús oporombohe mendasa sui poiñhi ãgua*

<sup>1</sup> Ipare Jesús osë Galilea sui, oso Judea ivi rupi arí sēsa coti iai Jordán rovai. <sup>2</sup> Ava rehí yuviraso saquicuei. Aheve setá imbaheasi vahe ombogüera.

<sup>3</sup> Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pñha opoi cuimbahe güembireco sui que mbahe tēi oyapose? —aipo ehi yuvireco chupe.

<sup>4</sup> Ahe rumo omboyeví fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? <sup>5</sup> Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi ãgua. Evocoyase ñuvirío yuvirecoira ñepeí ava nungar’ ehi. <sup>6</sup> Sese ndahe iri ñuvirío, ñepeí vahe ité yuvirecoira. Evocoyase ava Tũpa omomenda vahe oyese, ndiyai ava tẽi omboyepepi yuvireco oyesui —ehi.

<sup>7</sup> Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheã güembireco upe cuachiar poisa resendar opoi ãgua ichui? —ehi.

<sup>8</sup> —Pe poreroyaẽhisa pipe niha Moisés ãgũe ehi pẽu. Yipisui ité rumo Tũpa ndoipotai oyesui opoi ãgua yuvireco. <sup>9</sup> Esepia, acoi opoi vahe güembireco mbahe ndoyavi vahe sui omendase ambuae cuña rese, ahe oyemboaguasa tẽi vahe —ehi fariseo upe.

<sup>10</sup> Ipare semimbohe aipo ehi yuvireco chupe:

—Ëgũe ehise cuimbahe güembireco rese, evocoyase aviye catu ndayamendai chira —ehi.

<sup>11</sup> —Ndahei chira rumo opacatu osenducua che aipo ahe vahe yuvireco. Tũpa ombou vahe sembiaporã, ahe güeraño osenducua yuvireco —ehi güemimbohe upe—. <sup>12</sup> Esepia, oime pihañemoñetasa ava mendaẽhi ãgua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tũpa mborerecuasa reseño ité. Acoi oicatu vahe co ñehesa reroya ãgua, toviroyaño —ehi.



*Jesús osovasa chĩhivahe*

<sup>13</sup> Ipare ahe pendar güeru moviro chĩhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chĩhivahe?” ehiño serusar upe yuvireco.

<sup>14</sup> Jesús rumo aipo ehi:

—¡Mahera ndapeipotai iyu āgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru povrive —ehi.

<sup>15</sup> Ipare omondo opo chĩhivahe harive osovasa. Ichui osē oso.

*Mbia chĩhivahe imbahe eta vahe omoñeta Jesús*

<sup>16</sup> Mbia chĩhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

<sup>17</sup> —¡Mahera ereporandu cheu mbahe aviye vahe rese! —ehi—. Ñepiño ité aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

<sup>18</sup> —¿Uma vo aipo mborocuaita? —ehi.

Ahese omboyevī chupe:

—‘Ndereporoyucāi chira, nandeaguasāi chira, nandemondāi chira, nanderemirāi chiaveira ambuae ava rese, <sup>19</sup> eremboyeroyara nde ru, nde si avei, eresaísura ambuae ava nde yeāisu nungar eico’ ehi icuachiapri pipe —ehi mbahe yar upe.

<sup>20</sup> —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vāherā? —ehi.

<sup>21</sup> —Ereipotase mbahe tupri pipe nde reco āgua, emondopa rane nde mbahe; ahe sepri evocoyase

eremondora ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

<sup>22</sup> Aipo oyeupe hese rumo, ahe mbia oyepipiño ichui oviharēhisave oso. Esepia, mbahe yar ité seci.

<sup>23</sup> Evocoyase aipo ehi güemimbohe upe:

—Supi eté yavai eteanga imbahe eta vahe upe oique vahe rā che Ru mborerecuasave. <sup>24</sup> Aipo ahe iri: Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

<sup>25</sup> Aipo iñehesa renduse, semimbohe oyepihamondi aipo ehi:

—¡Ava angahu pñha evocoyase oñepisirora yuvireco viña! —ehi yuvireco.

<sup>26</sup> Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

<sup>27</sup> Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata āgua. ¿Mbahe evocoyase oimera oreu? —ehi.

<sup>28</sup> —Oime itera niha mbahe pēu. Esepia, acoi ari oyepotase opacatu mbahe recuñaro āgua, ahese che, Ava Riqueh̄ir, aguapira che rendave che mborerecuasave. Pe avei, che rupindar, peguapira doce tenda harive. Ahese opacatu juicio acoi doce imar Israel suindar recocuer rese peporandura curi. <sup>29</sup> Acoi opacatu ava oseya vahe güēta, anise que viqueh̄ir, anise vivri, güeindri, que vu, anise osi, guah̄ir, que oivi avei che raisusa pipe,

ahe oipisira omahera cien yupagüer rupi mbahe oseyá vahe iyavei virecora tecovesa apirêhi vahe. <sup>30</sup> Seta vai rumo cûritei yipîndar vahe, ipa tẽira yuvirecoi; setá aveira cûritei ipa tẽi vahe, yipîndar yuvirecoira curi —ehi.

## 20

### *Yembohesa oporaviqui vahe resendar*

<sup>1</sup> “Tũpa mborerecuasa inungar acoi ava ivi yar osẽ añihiveive oyeupe nara oporaviqui vahe reca ‘toporaviqui che uva tive yuvireco’ oyapave. <sup>2</sup> Oyosuse ava, ahese omoingatu oyeupe oporaviqui vahe upe ñepei ari mboraviqui repri imboepi água. Ahese opa omondo ocove imboporaviqui. <sup>3</sup> Ipare osẽ, oso añihivei, arivate catumi osepia ocarusu pipe ambuae ava oporaviquisa ndovirecoi vahe, <sup>4</sup> aipo ehi chupe: ‘Peso, tapeporaviqui che uva tive. Amboepi tuprira niha pẽu’ ehi. Ahe evocoyase yuviraso oporaviqui água icove. <sup>5</sup> Ipare oso iri mbiter ari rupi oyeupe oporaviqui vahe reca, ãgüe ehi tupri avei caharuse, las tres rupi. <sup>6</sup> Ipa osẽ iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohi tẽi ari momba cohava pehã?’ <sup>7</sup> ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. <sup>8</sup> “Pĩtu ramose, cove yar aipo ehi oporaviqui vahe rese yangarecuar upe: ‘Eñehpa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. <sup>9</sup> Evocoyase las cinco pipe

yuviroique vahe oporaviqui, ahe rane tenonde yugüeru. Oyacatu ñepeipei ñepeipei ari rupindar oipisi guarepochi yuvireco. <sup>10</sup> Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepeipei ari rupindar yuvireco. <sup>11</sup> Guarepochi pisire rumo oñemoiro cove yar upe yuvireco, <sup>12</sup> aipo ehi: ‘Co ava yugüeru ipa tēi vahe, ñepeipei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañe tēi oroporaviqui ari momba sacucuer upe oroico’ ehi. <sup>13</sup> Cove yar rumo aipo ehi ñepeipei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepeipei ari resendar ndeu acoi, Aviye, peye vahecuer rese cheu’ ehi. <sup>14</sup> ‘Evocoiyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi. <sup>15</sup> Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

<sup>16</sup> “Indó, ãgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vahe rã yuvireco curi” ehi güemimbohe upe.

### *Jesús omombehu iri omano ãgua*

<sup>17</sup> Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

18 —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomanó” ehira yuvireco cheu.  
 19 Ipare che mondora ava ndahei vahe yande mu upe mara-mara tēi che rereco ãgua che reroĩrosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

*Santiago, Juan si oporandu Jesús upe mbahe rese omembri upe nara*

20 Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopiha sovai oporandu ãgua mbahe rese.  
 21 Evocoyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepeí nde mbahe rese pocosa coti, ambuae nde mbahe rese pocoẽhisa coti nde mborerecuasave —ehi chupe.

22 —Pe ndapeicuai mbahe rese peporandu. ¿Peiporara catura pĩha co mbahe-mbahe tēi aiporara vaheṛã, inungar-ra que igua iro vahe aihu vaheṛã viña? —ehi.

—Taa, oroicatuño itera —ehi yuvireco.

23 —Supi eté peiporarara mbahe-mbahe tēi. Co rumo ndiyai cheu, che piri opomboguapi ãgua che mbahe rese pocosa coti, ambuae che mbahe rese pocoẽhisa coti avei. Che Ru rumo omoingatu güembiporavo upe nara oguapi vaheṛã che ipive —ehi.

<sup>24</sup> Aipo iñehesa renduse ore ambuae diez semimbohe, oroñemoiro Santiago, Juan upe avei.

<sup>25</sup> Evocoiyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi.

<sup>26</sup> Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. <sup>27</sup> Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese. <sup>28</sup> Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaherā ava eta repirā Carugar povri sui senose āgua —ehi.

### *Jesús ombogüera ñuvirío ndasesapisoi vahe*

<sup>29</sup> Ipare Jesús, güemimbohe reseve oñocuase tecua Jericó yuvireco, ahese ava rehi yuviraso saquicuei. <sup>30</sup> Aheve peri popive ñuvirío ava ndasesapisoi vahe oguapi yuvinoi. Evocoiyase osenduse Jesús ocuase supi, osapucái pĩrata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvinoi.

<sup>31</sup> Ahe ava oyaca-yacaño: “Quiriri” ehi yuvireco chupe. Ahe rumo osapucái pĩrata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

<sup>32</sup> Evocoiyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherã pëu? —ehi.

<sup>33</sup> —¡Ore Yar, ore mbosarecomi tõi eve! —ehi.

<sup>34</sup> Evocoiyase saïsusave opoco sesa rese. Ahe ramoseve ndasesapïsoi vahe osareco tupri ai eté yuvireco. Ipare yuvirasoño ité supï.

## 21

### *Jesús oi que Jerusalén pipe*

<sup>1</sup> Acoi orovirovise Jerusalén, oroyepota tecuami Betfagé popive, ivitri Olivo serer vahe ñipiimi. Aheve omondo ñuvirío güemimbohe <sup>2</sup> aipo ehi chupe:

—Peso co tecuami yande rovaindarve. Aheve pesepiara guaricu imembrï reseve ñapichimbrï imoha. Ahe peyorañora seru cheu. <sup>3</sup> Acoi que ava oporanduse yuvireco pëu sese, “Yar oiporu pota, ipare niha omboyevï voiñora” peyera chupe —ehi güemimbohe upe.

<sup>4</sup> Co ëgüe ehi chupe aracadendar Tüpa ñehe mombehusar ñehengagüer mboaviye ãgua, aipo ehi vahe:

<sup>5</sup> “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pëu guaricu harive imembrï reseve’ peyera” ehi.

<sup>6</sup> Evocoiyase evocoi semimbohe yuviraso, oyapo ité ocuaise yuvireco. <sup>7</sup> Güeru guaricu imembrï reseve yuvireco chupe. Omondo oturucuar icupeao ãgua yuvireco. Ipare Jesús oyeupi iharive.

<sup>8</sup> Iyavei ava rehii oipipira oturucuar perĩ rupi imboetei guasusa pipe. Ambuae evocoiyase oyasia pindo omondo perĩ rupi yuvireco saperã. <sup>9</sup> Ava rehii senonde, saquicuei avei uguata vahe osapucai yuvireco aipo ehi:

—¿Co mborerecuar guasu David suindar, imboeteipri tasecoi! —ehi—. ¿Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

<sup>10</sup> Oiquese Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pĩha co mbia? —ehi tẽi yuvireco.

<sup>11</sup> Ava rehii uguata vahe Jesús rupi aipo ehi yuvireco chupe:

—Co niha Jesús, Tũpa ñehe mombehusar, ivi Galilea rupindar, Nazaret pendar —ehi yuvireco chupe.

*Jesús omombopa ava mbahe mboepisar tũparo pipe sui*

<sup>12</sup> Ipare Jesús oique judío tũparo guasu pipe. Ipipendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. <sup>13</sup> Ipare aipo ehi chupe:

—Icuachiapri aracahendar pipe aipo ehi: ‘Che rẽta yeruresa rẽtarã’ ehi. Pe rumo imonda rai vahe rẽta nungar tẽi pereco —ehi.

<sup>14</sup> Aheve oyemboya Jesús rese yugüeru ava ndasapisoi vahe, ipãri-pãri vahe avei. Ahe opa ombogüera. <sup>15</sup> Osepiase rumo pahi rerecuar



guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tūparo pipe osenduse chihivahe sapucaisa: “¡Imboeteipri David suindar tasecoi!” ehise, ahese oñemoiro yuvireco <sup>16</sup> aipo ehi chupe:

—¡Eresendu vo aipo ehi tēi vahe chihivahe yuvireco! —ehi.

—Taa, asendu ité —ehi—. Pe no, ¿ndapeyeroquii vo sesendar ñehesa icuachiapri pipe:

‘Chihivahemi, pñitanimi avei osapucaira nde mboeteisa pipe yuvireco’ ehi vahe? —ehi.

<sup>17</sup> Ipare opaño oseya ava oso tecua Betania ve. Aheve ñepeí pñitu oque.

*Jesús omomara ivira higuera ndihai vahe oñehe pipe*

<sup>18</sup> Ahere ayihive añihiveive, oyevisse tecua Jerusalén ve, Jesús ndasiepoi oico. <sup>19</sup> Aheve peri popive osepiá ivira higuera. Ahe sese oyemboya oso ‘¿iha pñha?’ oya viña. So güeraño tēi rumo osepiá. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. <sup>20</sup> Ahe mbahe repiase, ore,

—¡Too, mara ehi rutei pñha co cñriteimi opa voi ipiru! —orohe tēi chupe.

<sup>21</sup> Ahese omboyeví oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera. <sup>22</sup> Indó, acoi peyeruresse mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

### *Jesús mborerecuasa*

<sup>23</sup> Ichui Jesús oi que iri judío tũparo guasu pipe oporombohe. Ahese pahĩ eta rerecuar, judío rerecuar avei oyemboya sese, oporandu yuvĩreco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

<sup>24</sup> Evocoyase ahe aipo ehi chupe:

—Che avei aporandura mbahe rese pẽu. Pemboyevisẽ che porandusa, ahese che avei amombehura ava porocuita rupi etẽ pĩha ayapo co mbahe vichico. <sup>25</sup> ¿Ava vo Juan ombou ava ãpiramo ãgua? ¿Tũpa pĩha, ava tẽi tie? —ehi.

Evocoyase oñemoñeta aipo ehi oyeupe yuvĩreco: “ ‘Tũpa ombou’ yahese chupe, ahe evocoyase omboyevisẽ yandeu: ‘¿Mahera ru evocoyase ndaperoyai?’ ehira. <sup>26</sup> Anise, ‘Ava tẽi remimbou’ yahese rumo, aviyeteramo opacatu ava yande amotarẽhira yuvĩreco. Esepia, opacatu: ‘Juan omombehu vahe ñehesa Tũpa suindar’ ehi etẽ yuvĩreco chupe” ehi. <sup>27</sup> Sese,

—Ndoroicuai etẽ Juan mbousar —ehiño yuvĩreco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pẽu —ehi mborerecuar guasu upe.

### *Ñuvirío ava rahĩr recocuer sui yembohesa*

<sup>28</sup> Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahĩr, co pipe eresora,

eporaviqui cove' ehi. <sup>29</sup> '¡Nachequerẽhi!' ehi voiño. Coiye rumo, '¿Mahera ãgũe ahe?' ehi. Ipare osoño ité, oporaviqui. <sup>30</sup> Ipare oso ambuae guahir upe: 'Eresora, eporaviqui cove' ehi tupri avei. Evo-coiyase, 'Asora, che ru' ehi angahu. Ipare rumo ndosoi eté. <sup>31</sup> ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tẽi aposar, cuña oyemondo-mondo tẽi vahe avei, ahe rane yuviroiquera Tũpa mborere-cuasave pe sui. <sup>32</sup> Esepia, Juan Oporoãpiramo vahe ou co tecocuer ihivi vahe mboyecua ãgua pẽu pe reco tupri ãgua viña. Pe rumo ndaperoyai eté. Co angaipa viyar iyavei co cuña oyemondo-mondo tẽi vahe ava upe, ahe rumo viroya ité yuvireco. Yepe pesepia tẽi opacatu evocoi mbahe viña, ipare rumo ndapeñecuñaroi pe recocuerai sui seroya ãgua —ehi mborerecuar guasu yuvirecoi vahe upe.

### *Ava mbahe tẽi oporaviqui vahe recocuer sui yem-bohesa*

<sup>33</sup> “Pesendu ambuae ava recocuer rese yem-bohesa: Oime ivi yar oñoti vahe uva oivi pipe, ahe oñachi tupri sereco, oyapo uva rĩavii ãgua; oyapo avei oi ivate vahe ahe sese mahemoha ãgua. Ipare oseya oivi ava oporaviqui vahe upe iporu ãgua. Ichui osẽ oso amombri vahesa rupi. <sup>34</sup> Coiye oyepotase ari uva pohosa, ahese omondo güembiguai oporaviqui vahe upe imboporandu ãgua ‘taipisi uva pohopri cheundar cute’ oyapave

viña. <sup>35</sup> Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. <sup>36</sup> Ipare rumo ivi yar setá catu omondo iri güembiguai. Oporaviqui vahe rumo mara-mara tẽiño avei vireco yuvireco.

<sup>37</sup> “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. <sup>38</sup> Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco. <sup>39</sup> Evocoyase oipisi, vinose miti pâhu sui, oyuca ité yuvireco” ehi.

<sup>40</sup> “Acoi ouse ivi yar, ¿mbahe vo oyapora oporaviqui vahe upe?” ehi oñhe rendusar upe.

<sup>41</sup> Ahe evocoyase,

—Opara revo oyuca saisuẽhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu ãgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

<sup>42</sup> Aipo ihe pare, aipo ehi oñhe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

Ëgüe ehi niha Yar yapo yande mohapisi ai eté’ ehi icuachiapri pipe. <sup>43</sup> Sese che Ru Tũpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe. <sup>44</sup> Acoi que oviapi vahe evocoi ita harive, opa tẽira ahe ae oyemomara; iyavei acoi oviapise

evocoi ita que ava harive, ahese opa tupri aveira omocañi —ehi Jesús oñehe oyese.

<sup>45</sup> Acoi osenduse pahí rerecuar iyavei fariseo yuvirecoi vahe, osenducua oyesendar ñehesa yuvireco. <sup>46</sup> Aheseve oipisi pota voi yuvireco viña. Osiquiyeño rumo ava rehi sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

## 22

*Jesús oporombohe carusa mendasa resendar rese*

<sup>1</sup> Ipare Jesús oporombohe iri ambuae ava recocuer rese aipo ehi:

<sup>2</sup> “Tūpa omborerecuasave inungar mborerecuar guasu guahir mendase oyapo pieta. <sup>3</sup> Ipare oyocuai güembigui eta ‘ava ichohopri upe toyugüeru cute’ oya. Ichohopri rumo niquerēhi iri yugüeru aheve. <sup>4</sup> Ipare oyocuai iri ambuae güembigui eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatú tembihu iyavei ayuca uca tivi iyavei ambuae mbahe mimba iquirá vahe. Che opacatu amoingatú. Sese toyugüeruño ité mendasave, ehi, peyera chupe’ ehi güembigui upe. <sup>5</sup> Ichohopri rumo ndoviroyai eté yuvireco. Evocoiyase ñepi osoño ocove, ambuae oso ombahe movendesave, <sup>6</sup> ambuae rumo oipisi sembigui mara-mara tēi sereco ãgua. Ahe ipipe oyuca yuvireco. <sup>7</sup> Evocoiyase mborerecuar guasu oñemoiro eteprisave omondo osundao eta co ava oporapichi vahe yuca ucapa ãgua, iyavei secua rapipa ãgua. <sup>8</sup> Ipare aipo ehi ambuae güembigui

eta upe: ‘Opa oingatu tembiyu mendasave. Co rumo yipindar ichohopri, ndiya iri chira yugüeru vaheerã cohave. <sup>9</sup> Sese peso opacatu ava guata catusa rupi, peñehe mendasave yugüeru vaheerã opacatu pe rovaichisar upe’ ehi. <sup>10</sup> Evocoyase sembiguai eta yuvinosepa yuviraso ocar rupi. Ahe osovãichi vahe setã omonuha yuvireco que seco tupri vahe, seco rai vahe avei; êgüe ehi ava savapipo tupri oi guasu mendasave yuvireco.

<sup>11</sup> “Evocoyase acoi mborerecuar oique ava ichohopri repia. Ipare omahecua tupri ñepei ava ipãhu pendar rese. Ahe rumo ndomondei turucuar mendasa resendar. <sup>12</sup> Evocoyase aipo ehi chupe: ‘Che mboripar, ¿mara ere eique ave co turucuar mendasa resendar porẽhi?’ ehi. Ahe rumo noñehiño ité chupe. <sup>13</sup> Evocoyase, ‘Peipisi co mbia, peñapichi ipi, ipo avei, pemose ocarve pĩtumimbisave. Aheve oyaseho tẽira, sãitere-tere tẽira mbaherasicuer rereco’ ehi ichohopri rese hañecosar upe. <sup>14</sup> Esepia, setã tẽi ichohopri, moviromi tẽi rumo iporavopri ipãhu sui” ehi mborerecuareta uve.

*Fariseo osecõha iri tẽi Jesús guarepochi rese yuvireco*

<sup>15</sup> Ipare fariseo oñemonuha, ipihañemoñeta yuvireco oyeupe Jesús ñehe yavi uca ãgua mborerecuar rovai imomara-mara tẽi ãgua. <sup>16</sup> Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe

mahahe supi tupri vahe Tũpa recocuer rese. Nde niha ndereroyai vahe ava ñehesa tẽi. Esepia, ava pihañemoñeta rupi ndereicoi vahe; nde pihañemoñeta rumo ñepei reseve erereco. <sup>17</sup> ¿Mara ehi nde pihañemoñeta? ¿Aviyera piha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

<sup>18</sup> Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tẽi vahe peico. ¡Mahahe che moingue pota mahahe tẽi piipe peye!  
<sup>19</sup> Pemboyecua ru ñepei guarepochi mborerecuar guasu upendar cheu —ehi.

Evocoyase güeru yuvireco chupe.

<sup>20</sup> —¿Ava rahanga vo co guarepochi rese chini iyavei ava rer vo co chini sese no? —ehi.

<sup>21</sup> —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mahahe chupendar, Tũpa upendar mahahe evocoyase pemondora Tũpa upe —ehi fariseo upe.

<sup>22</sup> Osenduse, oyepihamondii tẽi yuvireco. Evocoyase yuvirase yuviraso ichui.

*Saduceo oporandu Jesús upe cuerayevisa rese secoãhasave*

<sup>23</sup> Ahe ari piipe saduceo “ndipoi eté cuerayevisa” ehi vahe yugüeru Jesús upe, oporandu tẽi angahu yuvireco chupe:

<sup>24</sup> —Porombohesar, Moisés aipo ehi aracahe:

‘Que cuimbahe omanose guahiēhiseve, ahese tivri omendara sembirecocuer rese ahe viquehir omano vahecuer upe nara tahirā oico’ ehi —ehi yuvireco chupe—.

<sup>25</sup> Cohave, ore pāhuve, oime siete tupri oye-suindar pāve yuvirecoi vahe. Yipindar vahe omenda. Ipare omanoño guahiēhiseve. Evocoyase tivri omenda sembirecocuer rese. <sup>26</sup> Ahe omano guahiēhiseve avei no. Ēgüe ehi avei opacatu ambuae tivri, omano avei guahiēhiseve yuvireco. <sup>27</sup> Opacatu imano pare, cuña avei omano cute. <sup>28</sup> Evocoyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

<sup>29</sup> —Pe pīhañemoñetasa co coti tēi eté. Esepia, ndapeicuai eté Tūpa ñehe icuachiapri araca-hendar, ndapeicuai avei Tūpa pīratasa —ehi—.

<sup>30</sup> Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—. <sup>31</sup> Co cuerayevisa resendar rumo amombe-hura pēu. Aviye ndapeyeroqui anga vahe acoi Tūpa omombehu vahecuer rese. Supi eté ahe aipo ehi aracahe: <sup>32</sup> ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

<sup>33</sup> “¡Too!” ehi ava rehi. “¡Mara ehi rutei iprom-bohesa!” ehi tēi yuvireco.

### *Porocuita aviye catu vahe*

<sup>34</sup> Ipare fariseo oyanduse yuvireco Jesús omonguiriripañose saduceo oyesui, ahese



oñemonuha yuvireco. <sup>35</sup> Ñepei ipãhu pendar Moisés porocuaita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuaita sui yandeu’ oyapave viña:

<sup>36</sup>—Porombohesar, ¿uma ité vo porocuaita aviye catu vahe opacatu ambuae porocuaita sui? —ehi.

<sup>37</sup> Evocoyase ahe aipo ehi chupe:

—‘Eresaisura nde Yar Tũpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi. <sup>38</sup> Co porocuaita aviye catu vahe ambuae porocuaita sui. <sup>39</sup> Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. <sup>40</sup> Co ñuvirío porocuaita rupi oguata opacatu Moisés porocuaita icuachiapri, opacatu Tũpa ñehe mombehusar rembicuachía avei —ehi.

*¿Ava suindar pĩha Poropĩsirosar?*

<sup>41</sup> Fariseo ñemonuha viteseve, <sup>42</sup> Jesús oporandu chupe:

—¿Mara ehi pepihañemoñeta acoi Tũpa Rembiporavo ou vaherã ava pĩsiro ãgua rese? ¿Ava suindarra pĩha secoi? —ehi.

—Ahe niha David suindar secoira —ehi fariseo yuvireco chupe.

<sup>43</sup> Ahese aipo ehi fariseo upe:

—¿Mahera pĩha evocoyase David oñehese Espiritu pĩratasa pipe aracahe, “Che Yar” ehi chupe? Esepia, ahe aipo ehi:

<sup>44</sup> ‘Yar aipo ehi che Yar upe:

Eguapi che acato coti acoi che amondose voi eté nde amotarẽhimbar nde povrive yuvireco’

ehi David aracahe. <sup>45</sup> Evocoiyase, ¿mahera ru: “Poropĩsirosar David suindar secoira” peye, David teieté, “Che Yar” ehise chupe? —ehi fariseo upe.

<sup>46</sup> Evocoiyase ndoicatu iri imboyevi ãgua yuvireco cute. Ahe ari pĩpe sui ndipo iri que ñepei iquerẽhi vahe iñehe avi uca ãgua oñehe pĩpe yuvireco.

## 23

*Jesús oicua uca fariseo iyavei Moisés porocuita rese oporombohe vahe recocuerai*

<sup>1</sup> Ipare Jesús aipo ehi ava eta upe, oreu avei no: <sup>2</sup> “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco. <sup>3</sup> Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tẽi mbahe viña, ipare rumo co coti tẽi mbahe oyapo yuvireco. <sup>4</sup> Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepei oporocuita yuvireco no. <sup>5</sup> Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tẽi. Osiva rese, oyiva rese avei ipe guasu vahe vireco-reco tẽi oturucuar rese Tũpa Ñehengagũer cuachiapri yuvireco. Iyavei ipi catu vahe oturucuar popi moaro ãgua omondo yuvireco. <sup>6</sup> Oipota carusa rupi gũenara aviye catu vahe yuvireco, oseca avei tenda porañete catu vahe gũenara otũparo pĩpe

yuvireco no. <sup>7</sup> Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

<sup>8</sup> “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. <sup>9</sup> Iyavei, ‘Che ru’ ndapeyei chira que ava co ivi pipendar tēi upe. Esepia, ñepeño ité pe Ru pereco, ahe niha iva pendar. <sup>10</sup> Ndiyai avei, ‘Mborerecuar’ pembohe uca ava peyeupe. Esepia, Poropĩsĩrosar güeraño ité pe rerecuar secoi. <sup>11</sup> Acoi ava seco ivate catu vahe, ahe toporopĩtivĩ güeco mbegüesa pipe. <sup>12</sup> Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

<sup>13</sup> “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tũpa povrive seique rãgüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgüer sui.

<sup>14</sup> “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua-rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tũpa ñemoirosa ipĩrata catu vahe curi.

<sup>15</sup> “¡Peparaisu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tũpa rese! Peguata opacatu ivi rupi iyavei para guasu rovai rupi ava mbohe.

Ipare rumo pe remimbohecuer mbahe tēi catu pe sui. Pe nungar caruguar ratave nara tēi pereco uca.

<sup>16</sup> “¡Peparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pīpe yande ñehe mboaviye āgua, ēgüe yahe tēi eté; co rumo yamombehuse mbahe oro tūparo pendar rer pīpe, ahese iya itera yamboaviye yepi’ aipo peye tēi. <sup>17</sup> ¡Pe ndapembahecuai vahe nungar, ndasesapisoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pīpe niha oro rovasasa yepi. <sup>18</sup> Iyavei co uve avei aipo peye tēi peico: ‘Yamombehuse mbahe seropovēhepri renda rer pīpe yande ñehe mboaviye āgua, ēgüe yahe tēi eté; co rumo mbahe yamombehuse mbahe seropovēhepri renda hari pendar rer pīpe yande ñehe mboaviye āgua, ahese iya ité yamboaviyera yande ñehe yepi’ aipo peye tēi. <sup>19</sup> ¡Pe ndasesapisoi vahe nungar peico yepi! ¿Uma vo aviye catu vahe? ¿Evo-coi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi. <sup>20</sup> Sese acoi mbahe omombehu vahe mbahe seropovēhepri renda rer pīpe oñehe mboaviye āgua, ndahei serer pīpe güeraño, omombehu avei opacatu ihari pendar mbahe seropovēhepri rer pīpe, <sup>21</sup> iyavei acoi ava omombehu vahe mbahe tūparo rer pīpe oñehe mboaviye āgua, ahe omombehu ipipendar rer pīpe avei. Ahe niha Tūpa secoi. <sup>22</sup> Iyavei acoi omombehu vahe mbahe que ambuae ava upe iva resendar rer pīpe oñehe mboaviye āgua,

omombehu avei Tũpa recua rer pĩpe, Tũpa rer pĩpe avei. Esepia, Tũpa aheve ité secoi.

<sup>23</sup> “¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tẽi vahe pe recocuer pĩpe mbahe peico yepi! Yepe pemondo ñepepei diez pe remitĩ menta, anis, comino pereco vahe sui ñepepei Tũpa uve nara viña, pe rumo pepoi co porombohesa avĩye catu vahe porocuita re-sendar sui. Ahe peyapora mbahe ihĩvi vahe, pe-poroparaisuerecora iyavei pemboavĩye tuprĩra pe cuita yepi. Iyacatu rumo ahe pemboavĩye aveira viña. <sup>24</sup> ¡Pe ava mbohesar ndasesapĩsoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ëgũe peye co mborocuita upe.

<sup>25</sup> “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tuprĩ angahu tẽi vahe! Esepia, inungar igua rĩru iyavei tembihu rĩru icupe rupi tẽi yoseipri. Ipipe rumo iquĩha opĩtaño ité. Ëgũe ehi tẽi pe recocuer pe monda raisave, mbahe pota-pota tẽisave avei. <sup>26</sup> ¡Pe fariseo peico vahe, ndapepĩhañemoñetai vahe mbahe pe rembiapo ai rese, pemoatiro rane pe pĩha pĩpe mbahe yavaeté vahe sui! Ahese ramo pe rembiapo icatuprĩra cute.

<sup>27</sup> “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tẽi vahe mbahe pe recocuer pĩpe peico! Pe recocuer inungar tuvĩpa imomoro-chimbri tẽi. Iharĩve tẽi icatuprĩ chupe. Ipipe rumo tehõgũer cangũer iyavei opacatu

mbahe yavaeté vahe ovireco oyese. <sup>28</sup> Ëgüe peye: ava rembiepiave aviye pe reco ihivi vahe viña, pe piha pipe rumo oime pe porombopasa iyavei opacatu mbahe-mbahe tēi.

<sup>29</sup> “¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoin-gatu Tūpa ñehe mombehusar ruvipagüer peico sese pe yemomahenduha ãgua iyavei pemoporañete ai tēi ava seco ihivi vahe ruvipagüer yepi viña. <sup>30</sup> Ipare aipo: ‘Yande yaicose revo aracahe yande ramoi recose, ndayaipitivi chietera Tūpa ñehe mombehusar yuca ãgua yuvireco viña’ peye tupri tēi. <sup>31</sup> Aipo peyese rumo, pemboyecua Tūpa ñehe mombehusarer yucasar suindar pe yesusa. <sup>32</sup> ¡Pemboyeapi iriño evocoyase pe ramoi rembiapocuerai!

<sup>33</sup> “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve. <sup>34</sup> Evocoyase che amboura pēu Tūpa ñehe mombehusar ava yaracua vahe iyavei ava pe mbohe ãgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. <sup>35</sup> Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai. <sup>36</sup> Supi eté opacatu co mbahe tēi oura

pe recove viteseva” ehi.

### *Jesús oyaseho Jerusalén pendar rese*

<sup>37</sup> “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. <sup>38</sup> Sese seyapirā tēi peicora. <sup>39</sup> Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

## 24

### *Jesús omombehu judío tūparo guasu mocañi āgua*

<sup>1</sup> Ipare Jesús osē judío tūparo pipe sui oso. Ahe-seve ore semimbohe oroyemboya sese aipo orohe chupe: “¡Ore Yar, esepia co tūparo!” orohe. <sup>2</sup> Ahe rumo:

—Supi eté amombehu pēu: co opacatu pesepia vahe, ndipoi chietera que ñepi ita oyeha vite vahe. Opacatu ité imondurusara curi —ehi oreu.

### *Jesús omombehu mbahe oime vaheerā ari cañi renonde*

<sup>3</sup> Ipare Jesús oso ivitri Olivo ve oguapi oī. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu āgua iyavei ari cañi āgua? —orohe chupe.

4 —Peicua catu, peyembopa ucai rene ambuae ava upe peico. <sup>5</sup> Esepia, setá ava yugüerura, ‘Che aico Tũpa remimbou ava pĩsiro água’ ehi tẽira ava eta mbopa yuvireco. <sup>6</sup> Iyavei pesendura ñehesa vavasa resendar cohawe iyavei que rupi. Ndapeyembosiquiyeyi chira rumo ichui. Esepia, ěgũe ehi rane itera niha; ndehi vitei chira rumo ari cañisa. <sup>7</sup> Esepia, ñepei ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi rirĩ opacatu-catu tẽi tecua rupi. <sup>8</sup> Opacatu evocoi mbahe rumo omboipĩ ramomi vahe mbahe tẽi porarasa.

<sup>9</sup> “Ahese pe pisira yuvireco mara-mara tẽi pe rereco água, pe yuca água avei. Iyavei opacatu ava-ava tẽi ndape ambotai chira che recocuer sui tẽi yuvireco. <sup>10</sup> Ahe ari rupi evocoyase setá ava ndache reroya iri chira yuvireco. Ahe oyeamotarẽhira iyavei omondora ambuae omboetasagũer yamotarẽhimbar povrive yuvireco. <sup>11</sup> Iyavei setá Tũpa ñehe mombehusar angahu tẽi oimera, ahe ava ombopa-mbopa tẽira yuvireco. <sup>12</sup> Ombouvicha catura mbahe-mbahe tẽi naporai vahe. Ipipe sui ndoyeaisu tupri iri chira ava yuvireco. <sup>13</sup> Acoi ava oyemoviracua vaheño rumo ari ipa vahe rupi, ipĩsiropri yuvirecoira. <sup>14</sup> Iyavei co ñehesa icatupri vahe Tũpa mborerecuasa resendar imombehusapa ranera opacatu ivi rupi icua uca água. Ahese ramo oimera cañisa co ivi pipe” ehi oreu.

<sup>15</sup> “Tũpa ñehe mombehusar Daniel oicuachía mbahe-mbahe tẽi aposa resendar oime vaherã tũparo guasu maranehi vahe pipe aracahe. Ahe



pesepiase oi maranehi pipe —acoi oyeruqui vahe, ahe tosenducua tupri yuvireco—, <sup>16</sup> evocoiyase Judea ve yuvirecoi vahe toñemipa poyava ivitri rese yuvireco ichui; <sup>17</sup> iyavei acoi güêta harive yuvirecoi vahe ogüeyise, toi que iri eme güêtave ombahe reca; <sup>18</sup> iyavei acoi que rupi tēi yuvirecoi vahe, toyeve iri eme güêtave que oyeaosa renose āgua yuvireco. <sup>19</sup> ¡Iparaisu itera cuña ipuruha vahe, imembi pītani vahe avei yuvireco! <sup>20</sup> Peporandu Tūpa upe pe recua pipe sui pe sēhi āgua irohi pipe, mbituhusa ari pipe avei. <sup>21</sup> Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. <sup>22</sup> Iyavei nomombituhuse Tūpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

<sup>23</sup> “Iyavei que ava, ‘Esepia co Poropisirosar secoi’; anise, ‘Peve secoi’ ehise yuvireco pēu, aní chira peroya aipo ehi vahe. <sup>24</sup> Esepia, yugüerura ava ‘che Poropisirosar aico’ ehi tēi vahe iyavei ‘che amombehu vahe Tūpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Ipipe osecōāhara Tūpa rembiporavo imbopa āgua yuvireco. <sup>25</sup> Opa aipo co senondeve amombehu pēu. <sup>26</sup> Sese que ava pēu: ‘Pesepia pe ivi iporupirēhisave secoi’ ehise, pesoi rene aheve seroyasave, aní chiaveira peroya acoi ‘pesepia co secoi oi pipe’ ehi vahe yuvireco. <sup>27</sup> Che rumo inungar overa vahe sendi añihivei sui caharu coti ocua iva rese, ēgüe ahera che, Ava Riquehir, opacatu

ava rembiepiave ayevî irise vitu curi. <sup>28</sup> Esepia, mbahe rehõgüer reimesave, uruvu oñemonuha ati yuvîreco yepî” ehi güemimbohe eta upe.

*Jesús yevî ãgua resendar*

<sup>29</sup> “Ahe arî pipe mbahe-mbahe tẽi pare cũriteimi ndoyecua irî chira arî, yasî avei ndosesape iri chira, yasî tata avei opara ovîapi ìva sui iyavei ìva resendar mbahe orîrîira yuvîreco. <sup>30</sup> Ahese oimera ìva rese iporẽhi vahe che, Ava Rîquehîr, yu ãgua resendar. Evocoyase opacatu ava-ava tẽi co ìvî pîpendar oyaseho tẽira osîquiyepave yuvîreco. Che repia aveira yuvîreco agüeyise ìva quiha rese che pîratasa rendîgüer porañetesa pipe. <sup>31</sup> Iyavei amboura che rembiguai eta ìva pendar. Ahe evocoyase güemimbi omoñehe pîratara opacatu che rembiporavo co ìvî rupindar que amombri rupi yuvîrecoi vahe monuha ãgua” ehi.

<sup>32</sup> “Peyembohera ìvîra higuera recocuer sui: Co ìvîra soquî ramose, yaicua cõimi arî sacu vahe yepota ãgua yandeu yepî. <sup>33</sup> Na ehi aveira pẽu che ñehe rupî tupri mbahe pesepiase, sese peicua cõimi eté che yevî ãgua. <sup>34</sup> Supî eté yuvîrecove vîtera ava osepia vahe co mbahe opase yavîye. <sup>35</sup> Ìva, ìvî opara ocañî, che ñehengagüer rumo imboaviyesa rane itera.

<sup>36</sup> “Ndipoi eté rumo ava oicua vahe arî iyavei hora che yevî ãgua. Ìva pendar che Ru rembiguai avei ndoicuai yuvîreco. Che avei ndaicuai eté. Che Ru güeraño ité rumo oicua.

<sup>37</sup> “Inungar ava Noé recose yuvîrecoi aracahe, ãgüe ehi tupri aveira che, Ava Rîquehîr, yevî ãgua renonde. <sup>38</sup> Yîpîve amarusu renonde, ahese

ava ocaru, oihu; guahir, guayri avei omomen-  
daño yuvireco. Noé arca pipe seiquese, ãgüe ehi  
vite yuvireco. <sup>39</sup> Nomohai eté rumo amarusu  
viapi ãgua yuvireco oyeupe viña, ãgüe ehi rumo  
aviyeteramo tõi amar oviapi imocañipa. ãgüe ahe  
aveira che, Ava Riquehir, ayevi aviyeteramo tõi.  
<sup>40</sup> Evocoi arí pipe oimera ñuvirío ava amombri  
güecua sui yuvirecoi vahe: ñepe serasosara, in-  
dugüer rumo opítara. <sup>41</sup> ãgüe ehi aveira ñuvirío  
cuña ohicho vahe upe: ñepe serasosara, indugüer  
rumo opítara.

<sup>42</sup> “Sese pemahemoha yepi. Esepia, ndape-  
icuai mbahe arí pipe che, pe Yar, ayevira iva sui.  
<sup>43</sup> Iyavei peyapisaca tupri co rese: inungar acoi oi  
yar oicuase revo que hora pítu pipe imonda vahe  
yepota ãgua, ahese imahemohara sese güeta pipe  
seiqueñi ãgua viña. <sup>44</sup> ãgüe peye aveira peyemoin-  
gatu che yevi ãgua rese. Esepia niha, che, Ava  
Riquehir, aporoesapiha tõi vitu curi” ehi.

*Mbiguai omboaviye vahe ocuaita, nomboaviyei  
vahe avei*

<sup>45</sup> “Acoi ava mbahe rese ñangarecuar omboaviye  
tupri vahe ocuaita, yaracua vahe avei, ahe chupe  
serecuar oseya icuaitarã güeta pipendar rese  
hañeco ãgua ‘tembihi tomondo che rëta pipendar  
upe che porocuita rupi’ ohesave. <sup>46</sup> Acoi om-  
boaviyese ocuaita, ahese oviharetera güerecuar  
yevise. <sup>47</sup> Supi eté niha serecuar oyocuaire  
opacatu ombahe rese hañeco ãgua. <sup>48</sup> Ahe mbiguai  
rumo ndipihaise ‘ndoyepota vitei chira revo che  
rerecuar’ oya, <sup>49</sup> omboetasa omboipi mara-mara  
tõi sereco iyavei oyemboya caguar tõi rese ipiri

ocaru iyavei oihu tēi āgua. <sup>50</sup> Ipare rumo sereciar oyepotara imahemohaēhiseve. <sup>51</sup> Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

## 25

### *Diez cuñatai ndaseco marai vahe resendar ñehesa*

<sup>1</sup> “Evocoi ari pipe Tūpa mborerecuasa inungarra mendasave diez cuñatai ndaseco marai vahe vīrasora tataendi ambuae cuña mevi pīsī āgua yuvireco. <sup>2</sup> Ipāhuve yuvirecove cinco ndipihāñemoñetai vahe, ambuae cinco rumo ipihāñemoñeta tupri vahe yuvireco. <sup>3</sup> Ipare ndipihāñemoñetai vahe oipīsī guataendirā yuvireco, ndovīrasoi rumo yandi guataendi riru mboapipo iri āgua yuvireco; <sup>4</sup> evocoi ipihāñemoñeta tupri vahe rumo vīraso yandi siru pipe guataendi reseve yuvireco. <sup>5</sup> Acoi ndoyepota apihaise cuña mevi, ahese sopesi tēi yuvireco. Coiye opaño yuviroque yuvireco ichui. <sup>6</sup> Pītu mbīter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesē ipīsī āgua cute!’ ehi. <sup>7</sup> Evocoiyase opacatu evocoi cuñatai oñarapuha voi iyavei omoingatu guataendi yuvireco. <sup>8</sup> Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chīhi pe yandi oreu. Esepia, ogüe pota ité ore rataendi’ ehi tēi yuvireco. <sup>9</sup> ‘Aní, ndiyai chira revo oromondo vaherā pēu. Iyacatu revo peso imboepisave serocua peyeupe nara’ ehi. <sup>10</sup> Imboepi yuvirasovīteseve, ou cuña mevi cute. Oyemoingatu vahe

rumo yuviroique supi mendasave. Evocoiyase saquicuerive voi omboya oquenda rãrosar. <sup>11</sup> Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha. <sup>12</sup> ‘Aní, ndopocuai vahe ité’ ehiño chupe.

<sup>13</sup> “Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

### *Ñhesa guarepochi mondosea resendar*

<sup>14</sup> “Iyavei Tūpa omborerecuasave inungar-ra ava mbahe yar oso ãgua renonde ivi amombrisave omonuha güembiguai oguarepochi rãro ãgua viña.

<sup>15</sup> Yipindar ñepeu upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepeu upe seco etegüer rupi-rupi. Ipare voi oso cute.

<sup>16</sup> Evocoiyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco.

<sup>17</sup> Inungar avei ambuae oipisi vahe dos mil, ichui oipisi catu iri ambuae dos mil. <sup>18</sup> Ambuae oipisi vahe rumo ñepeu guarepochi, ahe oyoho ivicuar. Aheve oñoti güerecuar guarepochi.

<sup>19</sup> “Ipare coiye oyevise serecuar, ahese oñehe güembiguai upe oguarepochi retacuer cua ãgua.

<sup>20</sup> Yipindar cinco mil guarepochi oipisi vahe ranguatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. <sup>21</sup> ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi

guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi chupe. <sup>22</sup> Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: 'Ndo co erembou vahe dos mil cheu. Ipipe sui co ambuae aipisi irimi dos mil avei ndeu' ehi. <sup>23</sup> 'Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi avei chupe.

<sup>24</sup> "Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: 'Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepírer tēi avei ereipisi ndeyeupe nara. <sup>25</sup> Sese che siquiyesa pipe añomi ivivrive nde guarepochi. Ndo co nde mbahe' ehi chupe. <sup>26</sup> 'Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañoti vahe sui. <sup>27</sup> Ereyapocatumira che guarepochi guarepochi apocatusave cuese rahe viña che yevise voi senose ãgua cheu imboyevi catumi ãgua viña' ehi. <sup>28</sup> Ipare aipo ehi: 'Perocua guarepochi ichui, pemondora evocoi diez rupi guarepochi omboeta vahe upe' ehi. <sup>29</sup> 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. <sup>30</sup> Sese pemose co mbiguai ãgüe ehi tēi vahe ocarve pĩtumimbisave. Aheve

toyaseho, tasãitere tēi oĩ ehira serecuar chupe” ehi Jesús oreu.

*Jesús oura opacatu ava recocuer rese porandu ãgua*

<sup>31</sup> “Che, Ava Riquehir, ayevisé, opacatu che Ru rembiguai íva pendar reseve che reco ívategüer pipe, ahese aguapira che renda porañete vahesave ava recocuer rese porandu ãgua. <sup>32</sup> Evocoyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui. <sup>33</sup> Che evocoyase ovesa aipehara mbahe rese che pocosa coti, cavara mbahe rese che pocoẽhisa coti. <sup>34</sup> Ahese che mborerecuar ívate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ívi apo ramo suive imoingatupri pẽu nara. <sup>35</sup> Esepia, ndacheriepoise, pe evocoyase pembou mbahe che remihura; iyavei che huseise, pe evocoyase pembou taihu; che aguata tẽise pe recua rupi vichico, pe avei oĩ pembou che que ãgua. <sup>36</sup> Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no’ ehi. <sup>37</sup> Evocoyase evocoi seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? <sup>38</sup> ¿Mbahese vo nde repiasa nde guatase ore recua rupi, ipare nde monguesa

ore piri, ipanese nde turucuarã, ore aipo evocoyase oromondo ndeu? <sup>39</sup> Iyavei, ¿mbahese vo aipo nde repiasa nembraheasise, anise que nde roquendasave, aheve aipo oroso nde repia yepi? ehira yuvireco cheu. <sup>40</sup> Evocoyase che, mborerecuarivate vahe, amboyevirã yuvireco chupe aipo ahera: ‘Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo egüe peye’ ahera.

<sup>41</sup> “Ahese aipo ahera cute che mbahe rese pocoẽhisa cotindar upe: ‘Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhise, evocoi imoingatupri opacatu carugar upe nara serecuar reseve. <sup>42</sup> Esepia, ndacheriepoise, pe evocoyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu; <sup>43</sup> ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapemboui cheu, chembraheasise vichico, iyavei che roquendasave, Yasomi tẽi sepia, ndapeyei eté cheu’ ahera. <sup>44</sup> ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembraheasise, anise nde roquendasave, marase vo mbahe rese nande pitivisai?’ ehi tẽira yuvireco cheu. <sup>45</sup> ‘Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoi eté’ ahera. <sup>46</sup> Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opaẽhise yuvirasora” ehi Jesús oreu.



## 26

*Jesús yamotarẽhimbar omboguai yuca ãgua yuvireco*

<sup>1</sup> Ipare Jesús aipo ehi oreu:

<sup>2</sup> —Pe peicua ñuvirío arĩ tẽi ipane vite co Pascua pieta yepota ãgua yandeu. Ahese che, Ava Riquehir, imondopri aicora che atica ãgua curusu rese yuvireco —ehi.

<sup>3</sup> Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rõtave. <sup>4</sup> Aheve oñemoñeta: ‘Yambopa ipisi yuca ãgua’ ehi yuvireco oyeupe. <sup>5</sup> Ahe rumo:

—Ndiyai pieta pipe ité yaipisi ava rehii yemondii guasuẽhi ãgua yandeu —ehi.

*Cuña oipiyere Jesús ãca rese mbahe sãacuá vahe*

<sup>6</sup> Jesús tecua Betania ve secoi, Simón lepra vireco vahecuer rõtave. <sup>7</sup> Aheve mesave chiniseve, cuña vireco vahe mbahe sãacuá vahe siru reseve viroyepota chupe. Ahe oipiyere Jesús ãca rese. <sup>8</sup> Orosepiase rumo oroñemoiro aipo orohe oreyeupe:

—¡Mahera vo co omocañi tẽi! <sup>9</sup> Omondo vahe ité tie co setá guarepochi rupi ava iparaisu vahe pĩtivii ãgua viña —orohe tẽi chupe.

<sup>10</sup> Jesús rumo oicua ore pihañemoñetasa. Sese aipo ehi oreu:

—¡Mahera vo co cuña pemañeco tẽi! Esepia, co mbahe oyapo vahe aviye ité cheu. <sup>11</sup> Ava iparaisu vahe niha yuvirecoiño itera pe pãhuve. Che rumo ãgüe ndahe viteñoi chira vichico pe pãhuve. <sup>12</sup> Esepia, co cuña oipiyere mbahe sãacuá

vahe che rese che tĩ ãgua renondeve. <sup>13</sup> Supi eté aipo ahe pẽu: co ñehesa pĩsĩrosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

*Judas Iscariote oyemoingatu Jesús mondo ãgua yamotarẽhimbar povrĩve*

<sup>14</sup> Ipare ñepei ore pãhu pendar, Judas Iscariote, oso, oñehe pahi eta rerecuar yuvĩrecoi vahe upe <sup>15</sup> aipo ehi:

—¿Mbovĩ rupi vo pemboepira cheu amondose Jesús pẽu viña? —ehi.

“Treinta guarepochi rupi” ehi yuvĩreco chupe. <sup>16</sup> Ahesa reseve voi oseca Jesús mondo ãgua yamotarẽhimbar upe.

*Jesús caru agüer ipa vahe güemimbohe rese*

<sup>17</sup> Ari yipĩndar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

<sup>18</sup> Evocoiyase,

—Peso tecua guasuve che cua vahe rõtave aipo peyera chupe: ‘Ore Mbohesar aipo ehi: Cõimi che mano ãgua, sese ayapo potami sõtave Pascua pieta che remimbohe reseve, ehi ndeu’ peyera chupe —ehi.

<sup>19</sup> Evocoiyase oyapo semimombehu rupi tuprĩ ité yuvĩreco, omoingatu carusa Pascua pieta resendar yuvĩreco aheve.

<sup>20</sup> Pĩtu ramomise, opacatu oroguapĩ mesave Jesús pĩri ore caru ãgua. <sup>21</sup> Ore carusave aipo ehi oreu:

—Supi eté aipo ahe pẽu: ñepei pe pãhu pendar che mondora che amotarẽhisar upe —ehi.

<sup>22</sup>—Che Yar, ¿che pĩha? —orohe-rohe tẽi ñepei-peĩ ore yacatu ore viharẽhisa pĩpe chupe.

<sup>23</sup> —Omondo vahe opo che caro pipe, ahe che mondora che amotarẽhisar upe —ehi—.

<sup>24</sup> Imboavĩyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Avĩye catura ndoyesuisse viña —ehi.

<sup>25</sup> Ahese Judas imondosavĩ oporandu:

—Ore Mbohesar, ¿che tie? —ehi.

—Taa, ¡nde ité niha ãgũe erera! —ehi chupe.

<sup>26</sup> Ore caru viteseseve, Jesús oipĩsi pan, “Avĩye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

<sup>27</sup> Ipare oipĩsi igua rĩru, “Avĩye ndeu” ehi Vu upe. Aipo ohe pare ombou oreu aipo ehi:

—Peĩhu peyacatu co sui. <sup>28</sup> Esepia, co che ruvi, ahe omoimera che Ru remimbotar ipiasu vahe pẽu, ahe oyepiyerera ava rehĩ angaipa rese ñero ãgua. <sup>29</sup> Ndaihu iri chira uva ricuer cheu arĩ oye-potase voi che Ru mborerecuasave aihura pe rese ambuae uva ricuer ipiasu vahe —ehi oreu.

*Jesús, “ ‘Ndaicuai vahe ité aipo mbia’ erera cheu” ehi Pedro upe*

<sup>30</sup> Ore sapucaire, oroso ivĩtri Olivo ve.

<sup>31</sup> Evocoyase Jesús aipo ehi oreu:

—Opara pemocañi che rese yeroyasa peyesui co pĩtu pipe. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi vahe. <sup>32</sup> Che cuer-ayevire rumo, aso voi etera pe renonera Galilea ve —ehi.

<sup>33</sup> Pedro rumo,

—Yepe ambuae opacatu nande reroya iri chira yuvireco, che rumo ndayepepi chietera nde sui —ehi chupe.

<sup>34</sup> —Che rumo supi eté aipo ahe ndeu: co pĩtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

<sup>35</sup> Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi ehi catuño ité chupe.

Aipo orohe pãve tupri tẽi chupe.

### *Jesús oyeriqui Getsemaní ve*

<sup>36</sup> Ipare Jesús rupi orosoño Getsemaní ve. Aheve aipo ehi oreu:

—Peguapi cohava; che aso ranera peve catumi, ayeroqui —ehi.

<sup>37</sup> Aheve viraso Pedro oyeupi iyavei ñuvirío Zebedeo rahir. Ahese oyandu oviharẽhisa oico.

<sup>38</sup> Evocoyase ahe aipo ehi chupe:

—Ndavihai eté. Esepia, che hã oyandu ité manosa. Pepita rane cohava iyavei pemahemo-hara pe yeroqui pipe che rese —ehi.

<sup>39</sup> Evocoyase oso tenonde catumi. Aheve oñenopiha ovapi ivi rese oyeriqui Vu upe aipo ehi:

“Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

<sup>40</sup> Ipare oyevī güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesi upe che rãro ãgua que ñepei hora che mondugüe ãgua peye!

<sup>41</sup> Pemahemoha, peyeroqui mbahe tēi pipe pe viapiēhi ãgua. Supi eté pequerēhi ité viña, pe reteducer tēi niha nipiratai pēu —ehi.

<sup>42</sup> Ichui imoñuviriosa rupi oso iri ojeroqui aipo ehi: “Che Ru, ereipotase che reique ãgua co mbahe tēi pipe, eyapo nde remimbotar che rese” ehi.

<sup>43</sup> Ipare oyevise, osesapiha iri iquesese ou. Esepia, sopesi nomboyeroyai eté yuvireco.

<sup>44</sup> Evocoiyase oseyapa iri oso ojeroqui ãgua imombosapisa rupi. Aipo ehi tupriño avei ojeroqui Vu upe. <sup>45</sup> Ipare oyevī iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive.

<sup>46</sup> Pepūha, yaso. Esepia, cōimi eté che amotarēhisar upe che mondo vaheã secoi —ehi.

### *Jesús oipisi yuvireco*

<sup>47</sup> Jesús ñehe vitesese, Judas oyepota oso chupe. Ahe ñepei semimbohe ore pãhu pendar, iyavei setá iteanga ava yugüeru quise pucu, ivira reseve-seve supi. Ahe pahī eta rerecuar yuvirecoi vahe judío rerecuareta porocuita rupi oyapo yuvireco.

<sup>48</sup> Yipindar rumo imondosar Judas aipo ehi: “Aso-vaupitese, ahese peicuara; ahe peipisira” ehi.

<sup>49</sup> Ipare oyemboya voi oso sese.

—¡Avirave, Porombohesar! —ehi sovaupite.

<sup>50</sup> —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

<sup>51</sup> Evocoiyase semimbohe secoi vahe supi vinose oquise pucu, oyasia pahi rerecuar ivate catu vahe rembiguai nambi.

<sup>52</sup> —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. <sup>53</sup> ¿Ndereicuai vo aporanduse che Ru uve viña, ahe evocoiyase cūrítei voi omboura doce mil sui setá catu vahe güembiguai che repi ãgua viña? <sup>54</sup> Ëgüe ehise rumo Tūpa Ñhengagüer icuachiapri ndayaviyei chietera viña, ahe co cūrítei osupiti —ehi.

<sup>55</sup> Ahese aipo ehi ava rehi upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tūparo pipe, ndapeyapoi eté co nungar cheu. <sup>56</sup> Co rumo opacatu ãgüe peye Tūpa ñehe mombehusar rembicuachiagüer mboaviye ãgua cute —ehi ava rehi upe.

Ahese voi opacatu oroñemosaipe, oroseya ahe aetemi Jesús ava rehi upe imoha.

*Jesús serasosa pahi rerecuar ivate catu vahe rovai*

<sup>57</sup> Ahese Jesús pisisar viraso Caifás rētave yuvireco, ahe pahi rerecuar ivate catu vahe secoi. Aheve oñemonuha Moisés porocuita rese oporombohe vahe, judío rerecuar yuvirecoi

vahe avei no. <sup>58</sup> Pedro rumo amombrĩ rupive tēi osaquicue moña oso. Ëgüe ehi oyepota pahi rerecuar ivate catu vahe rēta rocar āchisave. Aheve oique ipipe, iyavei oguapĩ oĩ sundao pāhuve ‘¿mara ehi etera pĩha sereco yuvireco?’ oya.

<sup>59</sup> Ahese pahi eta rerecuar iyavei opacatu porandusa ivate catu vahe pendar, ahe oñehengapo-ngapo uca tēi ava Jesús amotarēhisave yuca uca āgua yuvireco, <sup>60</sup> yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

<sup>61</sup> —Co mbia aipo ehi: ‘Che aicatu co tũparo monduru; aicatu aveira imopuha iri mbosapĩ arĩ rupi’ ehi —ehi tēi yuvireco chupe.

<sup>62</sup> Ahese pahi rerecuar ivate catu vahe opũha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

<sup>63</sup> Noñehei eté rumo. Ahese,

—Che orocuai Tũpa supi eté vahe rer pipe emombehu oreu: ¿Poropĩsirosar ité nde ereico, Tũpa Rahĩr? —ehi pahi rerecuar ivate catu vahe chupe.

<sup>64</sup> —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehĩr, aguapise Tũpa mbahe mboavaisarēhi acato coti, ayevisave avei iva quiha rese curi —ehi.

<sup>65</sup> Evocoiyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vīte yaico! Yasendupa niha aipo Tūpa upe iñehe-ñehe tēisa cūrītei. <sup>66</sup> ¿Mara ehi aipo pe pihave? —ehi.

—Supi eté, oyavī mbahe. ¡Tomanoño ité! —ehiño ivoya eta yuvireco chupe.

<sup>67</sup> Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, <sup>68</sup> aipo ehi yuvireco chupe:

—Nde niha aipo ereico Tūpa remimbou Poropīsīrosar, ¿eicua ité ru, ava evocoi ocua nde rese? —ehi yoyai catu-catu yuvireco.

*Pedro, “Ndaicuai vahe evocoi mbīa” ehi Jesús upe*

<sup>69</sup> Pedro evocoiyase oguapī sāro ocarve ñachimbri pipe oī. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

<sup>70</sup> Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

<sup>71</sup> Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

<sup>72</sup> —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbīa! —ehi angahu tēi.



<sup>73</sup> Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

<sup>74</sup> Ahe evocoyase,

¡Tũpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pëu! —ehi angahu tēi chupe.

Aipo iheseve, tacura oñehe. <sup>75</sup> Ahese Pedro oye-momahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osẽ, oyasehó iteanga oso.

## 27

### *Jesús serasosa Pilato rovai*

<sup>1</sup> Cõhe ramosẽ, ahese opacatu pahi eta rerecuar, judío rerecuar avei oñemonuha ati oyemboyo-ya guasu ‘Jesús tayucasa ité’ oyapave yuvireco.

<sup>2</sup> Ipare oipocua-pocua seraso mborerecuar guasu Pilato upe yuvireco.

### *Judas yeyuca agüer*

<sup>3</sup> Judas, acoi Jesús omondo vahe yamotarẽhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tēi tũparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyevi ãgua aipo ehi:

<sup>4</sup> —Che ayemboangaipa tiẽte vichico. Esepia, amondoño tēi mbia seco catupri vahe pëu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

<sup>5</sup> Evocoiyase opaño guarepochi omombó tũparo pipe. Ichui voi oso oyemboyaseco, oyeyuca.

<sup>6</sup> Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirã repri tẽi —ehi yuvireco.

<sup>7</sup> Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehõgüer tĩ ãgua’ oyapave yuvireco. <sup>8</sup> Sese cũritei co ivi upe, “Ava ruvi repri tẽi” ehi yuvireco yepi. <sup>9</sup> Êgüe ehi co imboaviye ité Tũpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua. <sup>10</sup> Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tũpa ñehe mombehusar aracahendar.

### *Jesús serasosa mborerecuar Pilato rovai*

<sup>11</sup> Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

<sup>12</sup> Evocoyase acoi pahi eta rerecuar iyavei judío rerecuareta oñemonuha vahe eipeve oiñhengapongapo tēi yuvireco. Nomboyevii eté rumo iñhehe chupe oyeepeĩ ãgua. <sup>13</sup> Evocoyase:

—¿Nderesendui vo aipo co opacatu ndeu ñeheñehe tēisa? —ehi Pilato chupe.

<sup>14</sup> Nomboyevii eté rumo que ñepeĩ angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

*“¡Tayaticasa!” ehi Jesús upe ava yuvireco*

<sup>15</sup> Mborerecuar guasu recosa ité ñepeĩ ava soquendapri renose ãgua Pascua pieta pipe ava rehii remimbotar rupi yepi. <sup>16</sup> Aheve oime soquendapri mbia icuapri vahe ité Barrabás serer vahe; <sup>17</sup> evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pñha, anise Jesús “Poropñisirosar” ehi vahe yuvireco chupe tie? —ehi.

<sup>18</sup> Esepia, ahe oicuaño ité ava rese yemoecatēhisa pipe sui imondopri secoise.

<sup>19</sup> Pilato güendave chini viteseve, sembireco omondo oñhe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

<sup>20</sup> Evocoi pahi eta rerecuar iyavei judío rerecuareta rumo ava rehii omonguerēhi, “Barrabás tosē; Jesús evocoyase tomano” he ãgua yuvireco.

<sup>21</sup> Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherã pēu? —ehi.

—¡Barrabás tosē! —ehi yuvireco.

22 —¿Mbahe vo evocoyase che ayapora Jesús rese chupe acoi ava, “Poropĩsirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

23 —¿Mbahe ité vo oyapo naporai vahe? —ehi tẽi ava rehii upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

24 Evocoyase Pilato: “Ndaicatui mbahe moin-gatu sepĩ ãgua” ehi tẽi oyeupe. Sese ava yaivu guasu catu-catu irise, ogüeru uca i. Ipípe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

25 —¡Ore rese ité, ore rahir rese avei toviapi que mbahe tẽi co mbia mano sui! —ehi atiño ité yuvireco.

26 Ahese Pilato omose uca Barrabás; Jesús rumo oinupá iteanga uca tucumbo tupeicha nungar pípe imondo curusu rese yatica ãgua.

27 Evocoyase mborerecuar sundao viroi que Jesús ambuae oi pípe. Aheve opacatu omboetasa omboyere tupri uca sese yuvireco. 28 Ahese os-equipa iturucuar ichui. Ipare omonde turucuar pĩra vahe yuvireco sese 29 iyavei omonde ñaca rese yu piapri, omondo avei ñepi tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tẽisa pípe yuvireco.

<sup>30</sup> Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco. <sup>31</sup> Ēgüe ehi yoyai catu-catu yuvireco. Ipare vırocuase turucuar pıra vahe ichui, ahese omonde iturucuar ité yuvireco sese. Ichui vıraso curusu rese yatica āgua yuvireco cute.

*Jesús yaticasa curusu rese*

<sup>32</sup> Acoi yuvinosese yuvıraso, osepia mbıa Cirene pendar, Simón serer vahe. Ahe chupe, “Erio, terevosı co curusu Jesús vıreco vahe rese” ehi voıño tēi yuvireco.

<sup>33</sup> Oyepotase yuvıraso Gólgota serer vahesave, ahe ‘ava ācagüer’ oya aipo ehi chupe, <sup>34</sup> aheve uva ricuer imboyesehaprı mbahe pıhaupiar rese omondo tēi yuvireco Jesús toıhu. Osāha tēi, ndoıhu potai rumo.

<sup>35</sup> Ipare oyatica curusu rese yuvireco. Ahese sundao iguayıño oyeupe iturucuar mboyaho-yaho āgua rese. <sup>36</sup> Ipare aheve oguapı yuvınoi sāro. <sup>37</sup> Iyavei omombehu ivate curusu rese ñaca harıve mbahe sui oyuca yuvireco: “Co Jesús judío rerecuar guasu” ehi icuachiaprı oı.

<sup>38</sup> Ñuvırío imonda rai vahe yaticasa avei curusu rese supıve yuvireco, ñepeı mbahe rese ipocosa cotı, ambuae evocoyase mbahe rese ipocōhısa cotı yuvireco. <sup>39</sup> Acoi ava ñocuasar iñehe-ñehe tēi, oñeaca mbovava, <sup>40</sup> aipo ehi yuvireco chupe:

—Nde acoi, “Opara tūparo amonduru. Ipare mbosapı arı rupı opa irıra amopuha” ere acoi cuese. ¡Eñepısiro ru nde ae cute! ¡Tūpa Rahir nde recose, egüeyı curusu sui! —ehi tēi yuvireco chupe.

41 Aipo ehi avei pahi eta rerecuar, Moisés porocuaita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

42 —Oipĩsiro ambuae, ahe ae rumo ndoicatui oñepĩsiro. Israel rerecuar guasu secoise, ¡togüeyi curusu sui cūritei, ahese voi seroyasara! 43 Ahe oyeroya Tūpa rese, Tūpa evocoiyase oipotase, toipĩsiro cūritei. Esepia, ahe, “Che Tūpa Rahir aico” ehi yandeu cuese —ehi yuvireco.

44 Imonda rai vahe avei rumo acoi yaticapri supive, ahe avei mara ehi-ehi tēi chupe.

### *Jesús mano agüer*

45 Ahese mbiter ari pipe, opa tupri pĩtu ivi rupi. Ëgüe ehi las tres rupi. 46 Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

47 Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

48 Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toiñu’ oya. 49 Ambuae rumo aipo ehiño yuvireco:

—Ëgüe tehiño rane, ¿oura pĩha Elías ipĩsiro ãgua? —ehi yuvireco.

50 Ahese Jesús sãse pĩrata iri, omano. 51 Ahe pipeve voi tūparo guasu turucuar ivate coti sui ovo tupri. Aheseve avei ivi orirĩi iyavei ita guasu-guasú oyeca. 52 Tehõgüer ruvipa ita apopri

avei oyemboi yuvireco iyavei setá Tūpa reroy-  
asar omano vahecuer, ahe avei opa ocuerayevi  
yuvireco. <sup>53</sup> Ēgüe ehi Jesús cuerayevire, ahe opa  
yuvinose tehögüer ruvīpa sui. Ipare yuviroique  
Jerusalén maranehi pīpe. Aheve setá ava upe  
oyemboyecua yuvireco.

<sup>54</sup> Evocoyase co sundao rerecuar iyavei Jesús  
rārosareta, ahe oyanduse ivi rīrii yuvireco iyavei  
ambuae mbahe ēgüe ehi vahecuer repiase, ahe  
oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —  
ehi tēi yuvireco.

<sup>55</sup> Iyavei setá cuña aheve amombrive osepia  
catu yuvinoha, ahe acoi Galilea sui yugüeru vahe-  
cuer Jesús rupi iyavei setá rupi oipītivīi yuvireco  
yepi. <sup>56</sup> Ahe ipāhuve María Magdalena secoi, iyavei  
ambuae María ahe Santiago, José si, Zebedeo rahir  
si avei supi secoi.

### *Jesús apocatu agüer tuvīpa pīpe*

<sup>57</sup> Pītu potase, ou mbia mbahe yar José serer  
vahe, ahe Jesús reroyasar tecua Arimatea pendar.

<sup>58</sup> Evocoyase ahe oso Pilato upe oporandu Jesús  
rehögüer rese. Evocoyase Pilato aipo ehi: “Aviye,  
timondosaño chupe” ehi. <sup>59</sup> José evocoyase viraso  
sehögüer. Ipare oimama tupri turucuar secose  
vahe ndiquihai vahe pīpe. <sup>60</sup> Ichui omoingue  
ombahe tuvīpa ipiasu vahe, ita oyoho uca vahe  
pīpe. Ipare osovapi ita guasu yapayere vahe pīpe  
oso. <sup>61</sup> Aheve María Magdalena ambuae María  
rese suvīpa rovai oguapi yuvinoi.

### *Jesús ruvīpa osãro sundao yuvireco*

<sup>62</sup> Ahere ayihive mb̄ituhusa ar̄i pipe, yuv̄iraso pahi eta rerecuar iyavei fariseo Pilato upe mbahe rese oporandu āgua <sup>63</sup> aipo ehi yuv̄ireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ar̄i pare omano vahe pāhu sui” ehi acoi cuese oicove v̄itese —ehi yuv̄ireco—.

<sup>64</sup> Sese emondo sundao sehōgüer ruv̄ipa rāro tupri āgua mbosapi ar̄i rupi semimbohe ñomiēhi āgua p̄itu pipe yuv̄ireco. Av̄iyeteramo, “Ocuerayevi omano vahe pāhu sui” aipo ehi tupri tēi tiētera ava upe yuv̄ireco. Aipo ehise yuv̄ireco, yip̄indar semira tēi vahe sui ivate catura serecosa —ehi yuv̄ireco.

<sup>65</sup> Pilato evocoyase aipo ehi chupe yuv̄ireco:

—Av̄iye—ehi—. Amondora sundao p̄eu. Peraso, pemov̄iracua tupri ité sāro āgua—ehi.

<sup>66</sup> Evocoyase yuv̄iraso tehōgüer ruv̄ipa rāro tupri āgua yuv̄ireco. Ahese omondo tehōgüer rovap̄isa ita guasu rese mbahe imom̄isa cua āgua yuv̄ireco. Ipare oseya aheve sundao sāro āgua yuv̄ireco cutē.

## 28

### *Jesús ocuerayevi*

<sup>1</sup> Cōhe ramomise, domingu pipe, María Magdalena iyavei ambuae María yuv̄iraso tehōgüer ruv̄ipa repia yuv̄ireco. <sup>2</sup> Av̄iyeteramo tēi or̄iri p̄iratá iv̄i Tūpa rembiguai iv̄a sui igüeyise. Ëgüe ehi oyepota tehōgüer ruv̄ipave ou, ahe v̄irocua itape guasu sovap̄isa ichui. Ipare ihar̄ive oguapi oī. <sup>3</sup> Ëgüe ehi sendí iteanga av̄iye acoi overa vahe.



Iturucuar evocoyase morochí eté. <sup>4</sup> Osepiase sundao, oriríí eteanga osiquiyepave yuvireco ichui, opa oyuca pucu-pucu tēi yuvireco. <sup>5</sup> Tūpa rembiguai rumo aipo ehi voi eté cuña upe:

—Pesiquiyei rene. Esepia, che aicua pe peseca Jesús yaticapirer. <sup>6</sup> Ndipoí eté cohave. Esepia, ahe ocuerayeví güemimombehu rupi eté. Tapesepia ru supagüer —ehi.

Ipare aipo ehi:

<sup>7</sup>—Peso poyava voi, tapemombehu semimbohe eta upe: ‘Ocuerayeví omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pëu —ehi Tūpa rembiguai cuña upe.

<sup>8</sup> Evocoyase cuña yuviraso poyava voi suvipa sui, osiquiye pãhuve rumo ovihãño yuvireco; ãgüe ehi yuvinoñá iteanga imombehu yugüeru oreu. <sup>9</sup> Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboetisave yuvireco. <sup>10</sup> Evocoyase ahe aipo ehi chupe:

—Pesiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

*Sundao omombehu mbahe güembiepia yuvireco*

<sup>11</sup> Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepiã vahecuer yuvireco. <sup>12</sup> Evocoyase pahi rerecuareta oñemoñeta judío rerecuar rese opihãñemoñeta mboyoya ãgua. Ichui omondo setá

guarepochi sundao upe yuvireco, <sup>13</sup> aipo ehiño yuvireco chupe:

—Aipo peyera ava uve: “Oroque viteseve pĩtu pipe, ahese revo Jesús remimbohe yugüeru sehögüer ñomi ãgua ore sui” peyera —ehi mborerecuar yuvireco chupe—. <sup>14</sup> Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

<sup>15</sup> Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cüritei judío Jesús cuerayevisa reroyaëhi yuvireco yepi.

*Jesús omondo güemimbohe ivi yacatu rupi oñehengagüer mombehu ãgua*

<sup>16</sup> Evocoyase ëgüe orohé oroso semimbohe once oroico vahe Jesús remimombehu ivi Galilea pendar ivitrive. <sup>17</sup> Acoi orosepiase rumo Jesús, ahese oromboetei oroico, yepe moviro tēi ore pãhu pendar ndoviroya tupri vitei yuvireco viña. <sup>18</sup> Evocoyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco ãgua ivave, ivive nara avei no —ehi—. <sup>19</sup> Peso ava upe opacatú ivi rupi iyavei pembohe che recocuer rupi eté yuvirecoi vaherã; peñapiramo avei che Ru rer pipe, che rer pipe, Espíritu Santo rer pipe avei no. <sup>20</sup> Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

**Tũpa Ñehengagüer**  
**New Testament in Guarayu (BL:gyr:Guarayu)**

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files  
dated 29 Jan 2022

c27c2d97-c359-59f5-b367-83efb2e33739